

水經注釋

12/25  
139  
13







5  
139  
13

水經注釋卷三十八

仁和趙一清誠夫錄

資水 澗水 湘水 灘水

澗水

資水出零陵都梁縣路山

資水出武陵郡無陽縣界唐糺山蓋路山之別名也謂

之大谿水東北逕邵陵郡武岡縣南縣分都梁之所置

也縣左右二岡對峙重岨齊秀閒可二里舊傳後漢伐

五谿蠻蠻保此岡故曰武岡縣即其稱焉大谿逕建興

縣南又逕都梁縣南漢武帝元朔五年以封長沙定王



子敬侯遂之邑也縣西有小山山上有渟水既清且淺  
其中悉生蘭草綠葉紫莖芳風藻川蘭馨馥遠俗謂蘭  
為都梁山因以為號縣受名焉

東北過夫夷縣

夫水出縣西南零陵縣界少延山東北流逕扶縣南本

零陵之夫夷縣也一清按沈約志云漢舊縣至晉曰夫夷今云扶者疑是避桓溫諱去夷夫

不可為縣名故為扶云漢武帝元朔五年以封長沙定王子敬侯

義之邑也夫水又東注邵陵水謂之邵陵浦口水也

又東北過邵陵縣之北

一清按兩漢志昭陵屬長沙孫吳始改曰邵陵此亦經文晚出之證

縣治郡下南臨大溪水逕其北謂之邵陵水魏咸熙二

年吳寶鼎元年

全氏曰五字注中注一清按魏祚終於咸熙二年乃孫皓甘露元年明年改元

寶鼎實晉武帝泰始二年也

孫皓分零陵北部立邵陵郡於邵陵縣

縣故昭陵也

一清按史記建元以來王子侯表武帝元朔四年封長沙定王子童為洛陵侯索隱

曰表作路陵在南陽夫長沙之子何以封於南陽括地

志云即昭陵是也酈氏疑之故不著洛陵表作路陵

路洛古通借校獵賦虎路三變晉灼曰路音洛然疑史

漢表誤昭陵屬長沙國後漢析置昭陽縣音諱昭改

曰邵陵邵谿水東得高平水口水出武陵郡沅陵縣首

望山西南流逕高平縣南又東入邵陵縣界南入于邵

水邵水又東會雲泉水水出零陵永昌縣雲泉山西北

流逕邵陽縣南縣故昭陽也雲泉水又北注邵陵水謂

之邵陽水口自下東北出益陽縣其間逕流山峽名之



爲茱萸江蓋水變名也

又東北過益陽縣北

縣有關羽瀨所謂關侯灘也南對甘甯故壘昔關羽屯軍水北孫權令魯肅甘甯拒之於是水甯謂肅曰羽聞吾咳唾之聲不敢渡也渡則成擒矣羽夜聞甯處分曰興霸聲也遂不渡茱萸江又東逕益陽縣北又謂之資水應劭曰縣在益水之陽今無益水亦或資水之殊目矣然此縣之左右處處有深潭漁者咸輕舟委浪謠詠相和羅君章所謂其聲繇邈者也水南十里有井數百口淺者四五赤或三五丈深者亦不測其深古老相傳

昔人以杖撞地輒便成井或云古人采金沙處莫詳其實也

又東與沅水合於湖中東北入于江也

湖卽洞庭湖也所入之處謂之益陽江口

漣水出連道縣西

資水之別水出邵陵縣界南逕連道縣故城在湘鄉縣西一百六十里控引衆流合成一谿東入衡陽湘鄉縣歷石魚山下多元石山高八十餘丈廣十里石色黑而理若雲母開發一重輒有魚形鱗鬣首尾宛若刻畫長數寸魚形備足燒之作魚膏腥因以名之漣水又逕



湘鄉縣南臨漣水本屬零陵長沙定王子昌邑漢表哀帝建平四年封長沙王子昌為湘鄉侯無定字又長沙定王傳元帝初元三年復立旦弟宗是日孝王五年薨之子魯人嗣王莽時絕哀平之世王乃魯人也昌是魯人之子諸侯王表魯人以元帝永光二年嗣四十八年薨諡曰繆

漣水又屈逕其縣東而入湘南縣也

東北過湘南縣南又東北至臨湘縣西南東入于湘

漣水自湘南縣東流至衡陽湘西縣界入于湘水也于臨湘縣為西南者矣

湘水出零陵始安縣陽海山

即陽朔山也應劭曰湘出零山蓋山之殊名也山在始安縣北縣故零陵之南部也魏咸熙二年孫皓之甘露

元年全氏曰七字注中注立始安郡湘漣同源分為二水南為漣

水北則湘川一清按善長此言非是詳見漣水篇東北流羅君章湘中記

曰湘水之出於陽朔則觴為之舟至洞庭日月若出入于其中也

東北過零陵縣東

越城嶠水南出越城之嶠嶠即五嶺之西嶺也秦置五嶺之戍是其一焉北至零陵縣下注湘水湘水又逕零陵縣南又東北逕觀陽縣與觀水合水出臨賀郡之謝沐縣界西北逕觀陽縣西縣蓋即水為名也又西北流注于湘川謂之觀口也



水經注釋

湘水

又東北過洮陽縣東

一清按漢志注如涪曰洮音韜

洮水出縣西南大山東北逕其縣南即洮水以立稱矣

漢武帝元朔五年封長沙定王子靖侯狗彘朱氏謀瑋箋曰按索

隱曰表作將燕一清按今本漢書將字作狩為侯國王莽更名之曰洮治也

其水東流注于湘水

又東北過泉陵縣西

營水出營陽冷道縣南雷山

沈氏曰當作營山

西流逕九疑山

下磐基蒼梧之野峯秀數郡之間羅巖九舉各導一谿

岫壑負阻異嶺同勢遊者疑焉故曰九疑山大舜窆其

陽商均葬其陰全氏曰按胡三省曰太史公云舜南狩崩於蒼梧歸葬於江南九疑則蒼梧九

疑兩地也合而山南有舜廟前有石碑文字缺落不可

言之者誤也復識自廟仰山極高直上可百餘里古老相傳言未有

登其峯者山之東北冷道縣界又有舜廟縣南有舜碑

碑是零陵太守徐儉立營水又西逕營道縣馮水注之

水出臨賀郡馮乘縣東北馮岡其水導源馮谿西北流

谿以託名焉馮水帶約眾流渾成一川謂之北渚歷縣

北西至關下關下地名也是商舟改裝之始馮水又左

合萌渚之水水南出於萌渚之嶠五嶺之第四嶺也其

山多錫亦謂之錫方矣渚水北逕馮乘縣西而北注馮

水馮水又逕營道縣而右會營水營水又西北屈而逕



營道縣西王莽之九疑亭也營水又東北逕營浦縣南  
 營陽郡治也魏咸熙二年吳孫皓分零陵置在營水之  
 陽故以名郡矣營水又北都谿水注之水出春陵縣北  
 二十里仰山南逕其縣西縣本泠道縣之春陵鄉蓋因  
 春谿為名矣漢長沙定王分以為縣武帝元朔五年封  
 王中子買為春陵節侯縣故城東又有一城東西相對  
 各方百步古老相傳言漢家舊城漢稱猶存知是節侯  
 故邑也城東角有一碑文字缺落不可復識東南三十  
 里尚有節侯廟都谿水又南逕新甯縣東縣東傍都谿  
 谿水又西逕縣南左與五谿俱會縣有五山山有一谿

五水會于谿門

朱氏謀瑋箋曰初學記引此注作會於縣門

故曰都谿也都

谿水自縣又西北流逕泠道縣北與泠水合水南出九

疑山

一清按應劭以此泠水為出丹陽宛陵縣西北入江而臣瓚非之師古曰瓚說是泠水見說文即漢志宛陵縣下之清水今謂之清弋江

豈可以泠谿目之乎仲瑗誠誤矣

北流逕其縣西南

縣指泠谿以即名王莽之泠陵縣也泠水又北流注于

都谿水又西北入于營水營水又北流注于營陽峽又

北至觀陽縣而出于峽矣大小二峽之間為浴沂之極

艱矣營水又西北逕泉陵縣西漢武帝元朔五年以封

長沙定王子節侯賢之邑也王莽名之曰溥潤零陵郡

治故楚矣漢武帝元鼎六年分桂陽置太史公曰舜葬



九疑實惟零陵或作零郡全氏曰四郡取名焉王莽之字注中注九疑郡也下邳陳球為零陵太守桂陽賊胡蘭攻零陵激流灌城球輒於內因地勢反決水淹賊相拒不能下縣有白土鄉零陵先賢傳曰鄭產字景載泉陵人也為白土嗇夫漢末多事國用不足產子一歲輒出口錢民多不舉子產乃敕民勿得殺子口錢當自代出產言其郡縣為表上言錢得除更名白土為更生鄉也晉書地道志曰縣有香茅氣甚芬香言貢之以縮酒也營水又北流注于湘水湘水又東北與應水合水出邵陵縣歷山崖陞嶮岨峻嶠萬尋澄淵湛于下應水湧于上東南

流逕應陽縣南晉分觀陽縣立蓋即應水為名也應水又東南流逕有鼻墟南王隱曰應陽縣本泉陵之北部東五里有鼻墟言象所封也山下有象廟言甚有靈能興雲雨余所聞也聖人之神曰靈賢人之精氣為鬼象生不惠死靈何寄乎應水又東南流而注于湘水湘水又東北得泔口水出永昌縣北羅山東南流逕石鷲山東其山有石紺而狀鷲因以名山其石或大或小若母子焉及其雷風相薄則石鷲羣飛頡頏如真鷲矣羅君章云今燕不必復飛也其水又東南逕永昌縣南又東流注于湘水又東北逕祁陽縣南又有餘溪水注之水



出西北邵陵郡邵陵縣東南流注于湘其水揚清汎濁  
 水色兩分湘水又北與宜谿水合水出湘東郡之新甯  
 縣西南新平故縣東新甯故新平也眾川瀉浪共成一  
 津西北流東岸山下有龍穴宜水逕其下天旱則擁水  
 注之便有雨降宜水又西北注于湘湘水又西北得春  
 水口水上承營陽春陵縣西北潭山一清按此是吳復  
 立之春陵縣晉志  
曰春陽屬零陵郡宋志又北逕新甯縣東又西北流注  
曰春陵令屬營陽太守于湘水也一清按漢志桂陽郡耒陽縣春山春水所  
 出北至鄱入湖過郡二行七百八十里  
 又東北過重安縣東又東北過鄱縣西承水從東南來注  
 之

承水出衡陽重安縣西邵陵縣界邪薑山東北流至重  
 安縣逕舜廟下廟在承水之陰又東合略塘相傳云此  
 塘中有銅神今猶時聞銅聲於水水輒變淥作銅腥魚  
 為之死一清按名勝志引此注作飛養魚經曰魚滿三  
 百六十則龍為之長而引飛出水內鼈則魚不  
 復去則魚飛承水又東北逕重安縣南漢長沙頃王子  
誠亦有之度邑也故零陵之鍾武縣王莽更名曰鍾桓也武水又  
 焉水出鍾武縣西南表山東流至鍾武縣故城南而東  
 北流至重安縣注于承水一清按下有缺文至湘東臨承縣北  
 東注于湘謂之承口臨承即故鄱縣也縣即湘東郡治  
 也郡舊治在湘水東故以名郡魏正元二年吳主孫亮



分長沙東部立縣有石鼓高六赤湘水所逕鼓鳴則土  
有兵革之事羅君章云扣之聲聞數十里此鼓今無復  
聲觀陽縣東有裴巖其下有石鼓形如覆船扣之清響  
遠徹其類也湘水又北歷印石石在衡山縣南湘水右  
側有磐石或大或小臨水石悉有跡其方如印纍然行  
列無文字如此可二里許因名為印石也湘水又北逕  
衡山縣東山在西南有三峰一名紫蓋一名容峰一清渭曰此處有脫誤盛宏之荊州記云衡山有三峰一名紫蓋一名石困一名芙蓉注少石困一句容峰  
最為竦傑自遠望之蒼蒼隱天故羅含云望若陣雲非  
清霽素朝不見其峯丹水湧其左澧泉流其右山經謂

之岫嶺山為南嶽也山下有舜廟南有祝融冢楚靈王  
之世山崩毀其墳得營邱九頭圖禹治洪水用白馬祭  
山得金簡玉字之書容峰之東有仙人石室學者經過  
往往聞諷誦之音矣衡山東南二面臨映湘川自長沙  
至此沿湘七百里中有九向九背故漁者歌曰帆隨湘  
轉望衡九面山上有飛泉下注下映青林直注山下望  
之若幅練在山矣湘水又東北逕湘南縣東又歷湘西  
縣南分湘南置也衡陽郡治魏正元二年吳孫亮分長  
沙西部立治湘南一清按魏正元二年吳五鳳二年也吳書孫亮傳郡以太平二年置則魏  
甘露二年晉太守何承天徙治湘西矣十三州志曰日華  
年也



水出桂陽郴縣日華山西至湘南縣入湘地理志曰郴縣有耒水出耒山西至湘南入湘湘水又北逕麓山東其山東臨湘川西傍原陸息心之士多所萃焉

又東北過陰山縣西沘水從東南來注之又北過澧陵縣西澧水從東南來注之

續漢書五行志曰建安八年長沙醴陵縣有大山常鳴如牛响聲積數年後豫章賊攻沒縣亭殺掠吏民因以

為侯湘水又北逕建甯縣西傍湘水縣北有空冷峽按方輿紀要引此文作空靈峽張舜民郴行錄同寰宇記作空船峽驚浪雷奔濬同三峽

湘水又北逕建甯縣故城下晉太始中立

又北過臨湘縣西瀏水從縣西北流注之

縣南有石潭山湘水逕其西山有石室石牀臨對清流湘水又北逕昭山山下有旋泉深不可測故言昭潭無底也亦謂之曰湘州潭湘水又北逕南津城西西對

橘洲全氏曰此即胡三或作吉字何氏曰四字注中注

也惟北為南津洲尾水西有橘洲子成故郭尚存湘水又

北左會五官水口湘浦也又逕船官西湘州商舟之所次也北對長沙郡郡在水東州城南舊治在城中後乃移此湘水左逕麓山東上有故城山北有白露水口湘



浦也又右逕臨湘縣故城西縣治湘水濱臨川側故卽名焉王莽改號撫陸故楚南境之地也秦滅楚立長沙郡卽青陽之地也秦始皇二十六年荆王獻青陽以西全氏曰按此乃二十六年詔書中語其時荆亡已三年矣漢書鄒陽傳越水長沙還舟青陽注張晏曰青陽地名也蘇林曰青陽長沙縣也漢高祖五年以封吳芮爲長沙王是城卽芮築也漢景帝二年封唐姬子發爲王都此王莽之鎮蠻郡也於禹貢則荆州之域晉懷帝以永嘉元年分荆州湘中諸郡立湘州治此城之內郡廨西有陶侃廟云舊是賈誼宅地中有一井是誼所鑿極小而深上斂下大其狀似壺

傍有一腳石牀纔容一人坐形流俗相承云誼宿所坐牀又有大柑樹亦云誼所植也城之西北有故市北對臨湘縣之新治縣治西北有北津城縣北有吳芮冢廣踰六十八丈登臨寫目爲塵郭之佳憩也郭頌世語云魏黃初末吳人發芮冢取木於縣立孫堅廟見芮尸容貌衣服竝如故吳平後豫發冢人於壽春見南蠻校尉吳綱曰君形貌何類長沙王吳芮乎但君微短耳綱瞿然曰是先祖也自芮卒至冢發四百年至見綱又四十餘年矣湘水左合誓口又北得石榔口竝湘浦也右合麻溪水口湘浦也湘水又北逕三石山東山枕側湘川



北即三石水口也湘浦也水北有三石成城為二水之會也湘水又逕瀏口成西北對瀏水

又北瀉水從西南來注之

瀉水出益陽縣馬頭山東逕新陽縣南晉太康元年改曰新康矣瀉水又東入臨湘縣歷瀉口成東南注湘水湘水又北合斷口又北則下營口湘浦也湘水左岸有高口水出益陽縣西北逕高口成南又西北上鼻水自鼻洲上口首受湘西入焉謂之上鼻浦高水西北與下鼻浦合水自鼻洲下口首受湘川西通高水謂之下鼻口高水又西北右屈為陵子潭東北流注湘為陵子口

湘水自高口成東又北右會鼻洲左合上鼻口又北右對下鼻口又北得陵子口湘水右岸銅官浦出焉湘水又北逕銅官山西臨湘水山土紫色內含雲母故亦謂之雲母山也

又北過羅縣西瀆水從東來流注之  
湘水又北逕錫口成東又北左派謂之錫水西北流逕錫口成北又西北流屈而東北注玉水焉水出西北玉池東南流注于錫浦謂之玉池口錫水又東北東湖水注之水上承玉池之東湖也南流注於錫謂之三錫逕水南有三成又東北注於湘湘水自錫口北出又得望



屯浦湘浦也湘水又北枝津北出謂之門逕也湘水紆  
 流西北東北合門水謂之門逕口又北得三溪水口水  
 東承太湖西通湘浦三水之會故得三谿之目耳又北  
 東會大對水口西接三津逕湘水又北逕黃陵亭西右  
 合黃陵水口其水上承太湖湖水西流逕二妃廟南世  
 謂之黃陵廟也言大舜之陟方也二妃從征溺於湘江  
 神遊洞庭之淵出入瀟湘之浦瀟者水清深也一清按說文瀟  
 水名从水蕭聲相邀切又瀟水清深从水蕭聲子叔切  
 則瀟是水名故朱子以當洞庭九江之一今注以瀟為  
 水清深蓋誤讀說文也又按山海經曰洞庭之山帝之  
 二女居之是常遊於江淵澧沅之風交於瀟湘之浦是  
 在九江之間出入必以飄風暴雨楚地記因之云巴陵  
 瀟湘之淵在九江之間道元既本山海經以立文而刪

去在九江之間一語殆不以洞庭為九湘中記曰湘川  
 江也江水注指東陵在廬江亦同此旨  
 清照五六丈下見底石如擣蒲矢五色鮮明白沙如霜  
 雪赤崖若朝霞是納瀟湘之名矣故民為立祠於水側  
 焉荊州牧劉表刊石立碑樹之於廟以旌不朽之傳矣  
 黃水又西流入於湘謂之黃陵口昔王子山有異才年  
 二十而得惡夢作夢賦二十一溺死於湘浦即斯川矣  
 湘水又北逕白沙戍西又北右會東町口澗水也湘水  
 又左合決湖口水出西陂東通湘渚湘水又北汨水注  
 之水東出豫章艾縣桓山西南逕吳昌縣北與純水合  
 水源出其縣東南純山西北流又東逕其縣南又北逕



其縣故城下縣是吳主孫權立純水又右會汨水汨水

又西逕羅縣北本羅子國也故在襄陽宜城縣西楚文

王移之於此秦立長沙郡因以為縣謂之羅水汨水又

西逕玉笥山羅含湘中記曰屈潭之左有玉笥山道士

遺言此福地也一曰地脚山汨水又西為屈潭即汨羅

淵也屈原懷沙自沈於此故淵潭以屈為名一清按說文長沙汨

羅淵屈原所沈之水昔賈誼史遷皆嘗逕此弭楫江波

投弔於淵淵北有屈原廟前有碑又有漢南一清按南

落郡太守程堅碑寄在原廟汨水又西逕汨羅成南西

流注于湘春秋之羅汭矣世謂之汨羅口湘水又北枝

分北出逕汨羅戍西又北逕壘石山東又北逕壘石戍

西謂之苟導逕矣而北合湘水自汨羅口西北逕壘石

山西而北對青草湖亦或謂之為青草山也西對懸城

口湘水又北得九口竝湘浦也湘水又東北為青草湖

口右會苟導逕北口與勞口合又北得同拌口皆湘浦

右逕者也

又北過下雋縣西微水從東來流注之

湘水左會清水口資水也世謂之益陽江湘水左逕鹿

角山東右逕謹亭戍西又北合查浦又北得萬浦咸湘

浦也側湘浦北有萬石戍湘水左則沅水注之謂之橫



房口東對微湖世或謂之麋湖也右屬微水即經所謂  
微水逕下雋者也西流注于江謂之麋湖口也湘水又  
北逕金浦戍北帶金浦水湖澁也湘水左則澧水注之  
世謂之武陵江凡此四水同注洞庭北會大江名之五  
渚戰國策曰秦與荆戰大破之取洞庭五渚也湖水廣  
圓五百餘里日月若出沒于其中山海經曰洞庭之山  
帝之二女居焉沅澧之風交瀟湘之浦出入多飄風暴  
雨湖中有君山編山君山有石穴潛通吳之包山郭景  
純所謂巴陵地道者也是山湘君之所遊處故曰君山  
矣昔秦始皇遭風於此而問其故博士曰湘君出入則

多風秦皇乃赭其山漢武帝亦登之射蛟於是山東北  
對編山山多篋竹兩山相次去數十里迴峙相望孤影  
若浮湖之右岸有山世謂之笛鳥頭石石北右會翁湖  
口水上承翁湖左合洞浦所謂三苗之國左洞庭者也

又北至巴邱山入于江

山在湘水右岸一清按巴邱山宋人以爲禹貢之東陵  
會彥和曰巴陵可知又曰沅漸无辰敘酉湘  
亦曰西陵則巴陵爲東陵可知又曰沅漸无辰敘酉湘  
資醴水皆合洞庭中東入於江是爲九江導江云過九  
江至於東陵今之巴陵巴陵之上卽洞庭也因九水所  
合遂名九江水經九江在長沙下雋縣西北楚地記云  
巴陵瀟湘之淵在九江之間是也晁以道云洞庭九水  
也胡渭曰以洞庭爲九江始於宋初胡旦而晁會從之  
朱子故主其說而力辨尋陽九江之非然去無澧二水  
而易以瀟蒸則意有未安澧水實會南江以東注洞庭











水經注卷之八

東流注于灘水灘水又南逕始興縣東魏元帝咸熙二

年吳孫皓分零陵南部立始興縣孫皓傳甘露元年以

零陵南部為始安郡桂陽南部為始興郡宋書州郡志

廣興公相孫皓分桂陽南部都尉立為始興郡領始興

令今注云云蓋誤記也且事在甘露元年十一月灘水

是為晉武帝泰始元年去魏咸熙二年差一歲

又南右會洛溪溪水出永豐縣西北洛溪山東流逕其

縣北縣本蒼梧之北鄉孫皓割以為縣洛溪水又東南

逕始安縣而東注灘水灘水又東南流入熙平縣逕羊

瀨山山臨灘水石間有色類羊又東南逕雞瀨山山帶

灘水石色狀雞故二山以物象受名矣灘水又南得熙

平水口水源出縣東龍山西南流逕其縣南又西與北

鄉谿水合水出縣東北北鄉山西流逕其縣北又西流

南轉逕其縣西縣本始安之扶鄉也孫皓割以為縣谿

水又南注熙平水熙平水又西注于灘水縣南有朝夕

塘水出西南有水從山下注塘一日再增再減盈縮以

時未嘗愆期同于潮水因名此塘為朝夕塘矣灘水又

西逕平樂縣界左合平樂溪水出臨賀郡之謝沐縣

南歷山西北流逕謝沐縣西南西南流至平樂縣東南

左會謝沐眾谿派流湊合西逕平樂縣南孫皓割蒼梧

之境立以為縣北隸始安谿水又西南流注于灘水謂

之平樂水



南過蒼梧荔浦縣

瀨水出縣西北魯山之東逕其縣西與濡水合水出永

豐縣西北濡山東南逕其縣西又東南流入于荔浦縣

注于瀨谿又注于瀨水瀨水之上有關一清按方輿紀要引注云瀨水

南逕都利山今本無之瀨水又南左合靈谿水口水出臨賀富川

縣北符靈岡南流逕其縣東又南注于瀨水也全氏曰瀨水一

名融水乃牂柯江之下流分鬱水豚水諸川入于交州

復至中國歷三十六灘而為離水本無關於湘水其引

瀨同源此大繆也范成大桂海虞衡志曰湘水源出陽

海山而瀨水乃牂柯江下流南與安地勢高二水遠

不相謀史祿始作靈渠派湘之流而注之瀨使北水南

合然則瀨水不出陽海其自陽海導湘水使合瀨水者

皆史祿之力也善長於湘瀨二篇皆言之不詳亦大疏

漏也又曰范云作靈渠之法于湘流沙碛中壘石作鏹

背銳其前逆分湘流為兩激之六十里行渠中以入瀨

江與俱南渠繞興安界深不數尺廣丈餘六十里置斗

門三十六士人但謂之斗舟入一斗則復開斗伺水積

漸進故能循崖而上建飯而下千斛之舟亦可往來治

水巧妙無如此渠零通鑑作濬渠即注所謂靈溪也

又曰按柳開曰湘瀨二水之名書記皆無說清化元年

開自全州移知桂州泝湘水抵分水嶺下復溯瀨水知

二水至嶺方分所謂相離也而乃北水曰瀨南水曰

瀨疑其不當為此瀨字酌其理增而今以為字焉仲塗之言頗

為書古無此瀨字酌其道而妄生異議者也一清按此事見

漢書嚴助傳云長老言秦之時嘗使尉屠睢擊越又使

監祿鑿渠通道張晏曰監郡御史也名祿又嚴安傳云

使尉屠睢將樓船之士攻越使監祿鑿渠運糧渠即靈



流者是因秦舊瀆耳至唐寶曆初渠道崩壞舟楫不通  
觀察使李渤遂壘石造堤如鐔背劈分二水每水制石  
斗門一使制之在人開閉開澗水則全入于桂江擁桂  
江則盡歸於湘水又于湘水鑿分水渠三十五步以便  
行舟據此則秦渠與零渠為二石湖云激湘  
入澗永言云開澗入湘二家言稍有不同

又南至廣信縣入于鬱水

漆水出桂陽臨武縣南繞城西北屈東流

漆水導源縣西南北流逕縣西而北與武谿合山海經  
曰肄水出臨武西南注於海入番禺西肄水蓋漆水之  
別名也武谿水出臨武縣西北桐柏山東南流右合漆  
水亂流東南逕臨武縣西謂之武谿縣側臨溪東因曰  
臨武縣王莽更名大武也谿水東南流左會黃岑谿水

水出郴縣黃岑山西南流右合武谿武水又南入重山  
山名藍豪廣圓五百里悉曲江縣界崖壁峻岨巖嶺干  
天交柯雲蔚靈天晦景謂之瀧中懸湍迴注崩浪震山  
名之瀧水

東至曲江縣安甯邑東屈西南流

瀧水又南出峽謂之瀧口西岸有任將軍城南海都尉  
任囂所築也囂死尉他自龍川始居之東岸有任將軍  
廟瀧水又南合泠水水東出泠君山山羣峰之孤秀也  
晉太元十八年崩十餘丈於是懸澗瀑挂傾流注壑頽  
波所入灌於瀧水瀧水右合林水水出縣東北洹山王



欽之始興記曰林水源裏有石室室前磐石上行羅十  
瓮中悉是餅銀采伐遇之不得取取必迷悶晉太元初  
民封驅之家僕密竊三餅歸發看有大蛇螫之而死湘  
州記曰其夜驅之夢神語曰君奴不謹盜銀三餅即日  
顯戮以銀相償覺視則奴死銀在矣林水自源西流注  
於瀧水又與雲水合水出縣北湯泉泉源沸湧浩氣雲  
浮以腥物投之俄頃即熟其中時有細赤魚遊之不爲  
灼也西北合瀧水又有藉水上承滄海水有島嶼焉其  
水吐納眾流西北注於瀧水瀧水又南歷靈鷲山山本  
名虎羣山亦曰虎市山以虎多暴故也晉義熙中沙門

釋僧律葺宇巖阿猛虎遠迹蓋律仁感所致因改曰靈

鷲山瀧水又南逕曲江縣東又言縣昔號曲紅曲紅山

名也東連岡是矣瀧中有碑文曰一清按瀧中碑是漢

動銘也其文曰桂陽太守周府君者徐州下邳人也諱  
憬字君光體性敦仁天姿薦厚方興閨門名敏州里舉  
孝廉拜尚書侍郎選汝南固始相遂拜桂陽縣丞宜魯  
之政敷二南之澤政以德化猶風騰撫集悉細缺綏  
有方進則貞直退則錯枉崇舉濟濟吉士對充朝招訓  
缺蒙開誘六蔽君子道長小人道消信感神祇靈瑞苻  
缺嘉敲生於野奇草像蕙南異相之樹超然連理於此  
缺時郭域惟甯郡又與興南海接比商旅所臻自瀑隆  
至弓曲壺由此水其源也出於王禽之山山蓋隆  
嶽三弓天泉肇沸踊發射其顛分杯離散爲十二山蓋隆  
陵隋阻企早錯連隔陬壅其末由駟鳥爾乃貫山鑽石  
經嶽四揚爭怒浮沈潛伏地龍屈澧隆鬱洳千渠萬  
滄合聚谿澗下迄安甌六瀧作難瀨洳洳沄沄潺湲  
雖詩稱百川沸騰高岸爲谷溪谷爲陵蓋莫若斯天軌







後方辨其名景蔣穎叔作武溪深乃謂名煜且押之韻  
蒼浦筆記曰漢周府君碑蓋古字通用不可不知劉氏昌詩  
圖經周府君名昕字君光其碑陰曲江字皆作曲紅而  
疑而慎於更改者如此會氏鞏南豐集不誤也乃知古人傳  
龍名昌樂疑其舊俗所傳如韓仲章曰不然縣名樂昌而  
刻雖缺尚可識也乃以此碑并陰遺余初以見之韓集云  
言前為樂昌令因道府君事云名憬問何以見之韓集云  
即此水也又後本跋尾云國子監直講劉仲章者為余  
水合流其俗謂水湍浚為龍韓退之詩云南下樂昌瀧  
入桂陽而桂陽水出郴州臨武縣盧溪曹溪諸水皆與武  
立廟刻石武源府君開此溪下合瀆水桂陽人便之為  
武溪何毒淫周府君善吹笛援為歌和之名曰武溪  
深其辭曰滔滔武溪一何深鳥飛不渡獸不能臨嗟哉  
南征其門人轅寄生善吹笛援為歌和之名曰武溪  
百一十八里武溪上武溪驚湍激石流數百里昔馬援  
韶州圖經云後漢桂陽太守周府君廟在樂昌縣西一  
見諸跋語中附載於篇次集古錄曰桂陽周府君碑按  
韶州圖經云後漢桂陽太守周府君廟在樂昌縣西一

蓋石古剝落以其形似求合於君光之字故云爾曾南  
豐顧云從知韶州王之材求得此碑陰曲江縣東凡卅一人姓具  
經名所則并錄曰周府君碑陰曲江縣東凡卅一人姓具  
詳放耶金石錄曰周府君碑陰曲江縣東凡卅一人姓具  
存酈道元水經注瀧水南逕碑陰曲江縣東凡卅一人姓具  
紅山名也而東西兩漢史皆作曲江今據此碑自縣紅  
區社而下凡十七人皆書為曲江何也隸釋曰右神漢桂  
無可疑者不知兩漢皆作曲江何也隸釋曰右神漢桂  
陽太守周府君碑功勳之紀銘隸額周府君名憬自固始  
相為桂陽守碑云熹平三年歲在攝提仲冬之月曲紅  
長區社與色子故吏建碑於瀧上蓋靈帝甲寅年也茲  
水發源王禽山千渠萬澮下湊六瀧舟楫過之若奔車  
失轡狂牛無廢喪寶玩流象犀積有日矣周府君思夏  
后龍門之績感李冰離堆之事排治湍梗人得利涉紀  
其功勳銘辭全逼騷雅有瓠子歌遺意韓退之詩云南  
下昌樂瀧險惡不可狀者即謂此也樂史寰宇記云龍  
隱可辯蓋憬字也廟今碑在韶州九齡廟中其名尚隱  
路後皆為君碑又曰周憬碑陰曲江諸家地理書皆云  
十六人熊君碑亦全兩漢皆作曲江諸家地理書皆云



水經注釋

漆水

水流屈曲故曰曲江唯水經云縣昔號曲紅山之名也前書工女大功皆只同用紅字未知水經何所據也盤洲之言本於南豐寰宇記梓州射洪縣下引李膺記云婁儂難東有射江土人語訛以江為洪則知曲江之為曲紅亦是音同之故熊君碑是漢綏民校尉熊君按地也碑云除補桂陽曲紅長故洪氏引以為證佐爾

理志曲江舊縣也王莽以為除虜始興郡治魏文帝咸熙二年孫皓分桂陽南部立一清按三國志吳書此事在甘露元年是晉武帝泰

始元年去魏咸熙二年差一歲

縣東傍瀧谿號曰北瀧水水左即東谿

口也水出始興東江州南康縣界石閣山西流而與漣

水合水出南康縣涼熱山漣谿山即大庾嶺也五嶺之

最東矣故曰東嶠山斯則改裝之次其下船路名漣谿

漣水南流注于東谿謂之漣口庾仲初謂之大庾嶠水

也東谿亦名東江又曰始興水又西邪階水注之水出

縣東南邪階山水有別源曰巢頭重嶺衿瀧湍奔相屬

徂源雙注合為一川水側有鼻天子城鼻天子所未聞

也朱氏謀埠箋曰幽明錄始興有鼻天子冢又有鼻天子城路史謂鼻天子即象也邪階水又

西北注於東江江水又西逕始興縣南又西入曲江縣

邸水注之水出浮嶽山山躡一處則百餘步動若在水

也因名浮嶽山南流注於東江東江又西與利水合水

出縣之韶石北山南流逕韶石下其高百仞廣圓五里

兩石對峙相去一里小大畧均似雙闕名曰韶石古老

言昔有二仙分而憩之自爾年豐彌歷一紀利水又南

水經注釋

卷三十八

音



逕靈石下靈石一名逃石高三十丈廣圓五百丈者舊傳言石本桂林武城縣因夜迅雷之變忽然遷此彼人來見歎曰石乃逃來因名逃石以其有靈運徙又曰靈石其傑處臨江壁立霞駁有若續焉水石驚瀨傳響不絕商舟淹留聆翫不已利水南注東江東江又西注于北江謂之東江口漆水自此有始與大庾之名而南入

滇陽縣也

過滇陽縣出涯浦關與桂水合

漆水南逕滇陽縣西舊漢縣也王莽之基武矣縣東有滇石山廣圓三十里挺嶠大江之北盤陟長川之際其

陽有石室漁叟所憩昔欲於山北開達郡之路輒有大蛇斷道不果是以今行者必於石室前汎舟而濟也漆水又西南歷皋口太尉二山之間是曰滇陽峽兩岸傑秀壁立虧天昔嘗鑿石架閣令兩岸相接以拒徐道覆漆水出峽左則滇水注之水出南海龍川縣西逕滇陽縣南右注漆水故應劭曰滇水西入漆是也

一清按漢志桂陽郡

滇陽縣下應劭曰滇水出南海龍川西入秦道元引之分而爲二上句又不云是應說

漆水又西

南涯水入焉山海經所謂湟水出桂陽西北東南注肄入敦浦西者也漆水又西南逕中宿縣會一里水其處隘名之爲觀岐連山交枕絕岸壁竦下有神廟背阿面



流壇宇靈肅廟渚攢石巉巖亂峙中川時水洊至鼓怒  
沸騰流木淪沒必無出者世人以為河伯下材晉中朝  
時縣人有使者至洛事訖將還忽有一人寄其書云吾  
家在觀岐前石間懸藤即其處也但扣藤自當有人取  
之使者謹依其言果有二人出外取書并延入水府衣  
不濡濡言此似不近情然造化之中無所不有穆滿西  
遊與河宗論寶以此推之亦為類矣溱水又西南逕中  
宿縣南吳孫皓分四會之北鄉立焉

南入于海

溱水又南注於鬱而入于海

水經注釋卷三十八終

海甯錢保塘  
華陽吳祖椿  
覆校



水經注釋卷三十九

仁和趙一清誠夫錄

涇水

深水

鍾水

耒水

洙水

澠水

瀏水

澗水

贛水

廬江水

涇水出桂陽縣廬聚

一清按今俗本涇俱作涇誤也說文

為彭蠡孔傳曰涇迴也釋文曰徐胡罪反韋空為反別無

水出桂陽之說又說文與水出桂陽縣廬聚

與水合涇字義去王切與水經合予宿疑水經涇水標題

志桂陽縣南入至四會入鬱林郡二行九百里應劭

沅今水經不言南入于海注云溱水又南注于鬱而

浦關與桂水合南入于海注云溱水又南注于鬱而

入于海注云溱水又南注于鬱而

入于海注云溱水又南注于鬱而

入于海注云溱水又南注于鬱而

入于海注云溱水又南注于鬱而



水經注釋

海是桂水與漓水俱注于鬱而入海與班志膈合臨武縣  
下又云漓水東南至滇陽入滙師古曰滙胡貽反蓋滙與  
桂音近而與滙形似滙水即桂水亦即滙水道元所謂山  
海經謂之滙水桂水其別名者是也滙集韻曰本作滙隸  
省作滙漢書作滙今作滙蓋因避宋太祖諱匡缺筆作匡  
而誤作滙耳滙水注黃本作滙蓋因避宋太祖諱匡缺筆作匡  
劭以桂水釋滙水注黃本作滙蓋因避宋太祖諱匡缺筆作匡  
史記南越傳云移檄告橫浦陽山滙溪關裴駘集解云徐  
廣云在桂陽通四會也索隱曰鄒氏劉氏本滙並作滙音  
年結反漢書作滙四會也索隱曰鄒氏劉氏本滙並作滙音  
察曰史記作滙今本有滙滙及滙青傳云出桂陽下滙水姚  
也水經云滙蓋近于古今考滙滙滙滙滙滙滙滙滙滙滙滙滙  
書作滙蓋近于古今考滙滙滙滙滙滙滙滙滙滙滙滙滙滙滙  
浦關皆作滙蓋近于古今考滙滙滙滙滙滙滙滙滙滙滙滙滙  
字去九音益遠更作滙字九無所據字經三寫魯變為魚  
信矣宋猶仍云開寶四年改滙字為滙字經三寫魯變為魚  
可知至宋猶仍云開寶四年改滙字為滙字經三寫魯變為魚  
作滙與說文合史記作滙與說文合史記作滙與說文合史記  
文合若滙則滙之似而訛猶之滙則滙之似而訛猶之滙則滙  
有作滙水者則滙之音之近而誘道元特起而糾之今本滙

又轉誤作雞  
益不足辨矣

水出桂陽縣西北上驛山盧溪為盧溪水東南流逕桂  
陽縣故城謂之滙水地理志曰滙水出桂陽南至四會  
是也滙水又東南流出桂陽南至四會是嶠之溪溪水  
下流歷峽南出是峽謂之貞女峽峽西岸高巖名貞女  
山山下際有石如人形高七尺狀如女子故名貞女峽  
古來相傳有數女取螺於此遇風雨晝晦忽化為石斯  
誠巨異難以聞信但啟生石中擊呱空桑抑斯類矣物  
之變化甯以理求乎溪水又合滙水滙水又東南入陽  
山縣右合漣口水源出縣西北一百二十里石塘村村

水經注釋 卷三十九 二



之流水側有豫章木本徑可二丈其株根猶存伐之積  
載而斧跡若新羽族飛翔不息其傍眾枝飛散遠集鄉  
亦不測所如唯見一枝獨在含漚水矣漚水東南流注  
于漚漚水又東南流而右與斟水合水導源近出東巖  
下穴口若井一日之中十溢十竭信若潮流而注漚水  
漚水又南逕陽山縣故城西耆舊傳曰往昔縣長臨縣  
輒遷擢超級太史逕觀言城勢使然掘斷連岡流血成  
川城因傾陔遂卽傾敗閣下大鼓飛上臨武乃之桂陽  
追號聖鼓自陽山達乎桂陽之武步驛所至循聖鼓道  
也其道如塹迄于鼓城矣漚水又逕陽山縣南縣故含

漚縣之桃鄉孫皓分立爲縣也漚水又東南流也

### 東南過含漚縣

應劭曰漚水東北入沅瓚注漢書沅在武陵去漚遠又  
隔湘水不得入沅漚水東南左合翁水水出東北利山  
湖湖水廣圓五里潔踰凡水西南流注于漚謂之翁水  
口口已下東岸有聖鼓杖卽陽山之鼓杖也橫在川側  
雖衝波所激未嘗移動百鳥翔鳴莫有萃者船人上下  
以篙撞者輒有瘡疾漚水又東南左合陶水水東出堯  
山山盤紆數百里有赭巖迭起冠以青林與雲霞亂采  
山上有白石英山下有平陵有大堂基耆舊云堯行宮



所陶水西逕縣北右注涇水涇水又逕合涇縣西王歆之始興記曰縣有白鹿城城南有白鹿岡咸康中郡民張魴為縣有善政白鹿來遊故城及岡並即名焉

南出涇浦關為桂水

關在中宿縣涇水出關右合漆水謂之涇口山海經謂之湟水徐廣曰湟水一名涇水出桂陽通四會亦曰涇水也漢武帝元鼎元年路博德為伏波將軍征南越出桂陽下湟水即此水矣桂水其別名也

深水

一清按深說文作寢

出桂陽盧聚

呂忱曰深水一名邃水導源盧溪西入營水亂流營波

同注湘津許慎云深水出桂陽南平縣也經書桂陽者縣本隸桂陽郡後割屬始興縣有盧溪盧聚山在南平縣之南九疑山東也

西北過零陵營道縣南又西北過營浦縣南又西北過泉陵縣西北七里至燕室邪入于湘

水上有燕室邱亦因為聚名也其下水深不測號曰龍泉

鍾水出桂陽南平縣都山北過其縣東又東北過宋渚亭又北過鍾亭與灌水合

都山即部龍之嶠也五嶺之第三嶺也

一清按後漢書吳佑傳章懷注



引南康記曰五嶺南康大庾一也桂陽甲騎二也九真  
 都龐三也臨賀萌渚四也始安越嶠五也廣州記則以  
 為大庾一始安二臨賀三桂陽四而以九真為揭陽合  
 為五嶺是注所言五嶺之次與鄧記合第考班志九真  
 郡有都龐縣應劭曰龐音龍師古曰音龔而桂陽之部  
 龍乃嶺嶠之名王象之輿地紀勝曰山之絕頂曰都逢  
 土人語訛曰龐也不知都部字相似龐龍音相聯而強  
 以都逢為土音山之絕頂之說殆因嶺嶠而傳會耶此  
 與九真之都龐縣無涉鄧記鍾水即嶠水也庾仲初曰  
 誤也當以南平部龍為是

嶠水南入始興灌水一清按耒水篇引庾說作始興漆水蓋漆水出滄浦關與桂水合也

注于海北一清按耒水篇引庾說北字下多一水字入桂陽湘水注于江是

也灌水即桂水也灌桂聲相近故字隨讀變經仍其非

矣桂水出桂陽縣北界山山壁高聳三面特峻石泉懸

注瀑布而下北逕南平縣而東北流屈鍾亭右會鍾水

通為桂水也故應劭曰桂水出桂陽東北入湘

又北過魏甯縣之東

一清按續志桂陽郡漢甯縣永和元年置吳改曰陽安晉改曰晉甯宋以後因之無魏甯也此如廣魏魏興之類道元蓋併經而改之

魏甯故陽安也晉太康元年改曰晉甯縣在桂陽郡東  
 一百二十里縣南西二面岨帶清溪桂水無出縣東理  
 蓋縣邑流移今古不同故也

又東北入于湘

耒水出桂陽郴縣南山

耒水發源出汝城縣東烏龍白騎山西北流逕其縣北  
 西流三十里有十四瀨各數百步澹流奔急竹節相



九經注釋 鍾乳山 耒水 五 川三一

次亦為行旅溯涉之艱難也又西北逕晉甯縣北又西左合清溪水口水出縣東黃皮山西南流歷縣南又西北注于耒水汝城縣在郡東三百里餘山又在縣東耒水無出南山理也

又北過其縣之西

縣有淶水出縣東俠公山西北流而南屈注於耒謂之程鄉溪郡置酒官醴于山下名曰程酒獻同鄰也耒水

又西黃水注之水出縣西黃岑山山則騎田之嶠一清按南

山水出注于大溪號曰橫流溪溪水甚小冬夏不乾俗康記作甲騎五嶺之第二嶺也黃水東北流案盛宏之云眾

亦謂之為貪泉飲者輒冒於財賄同於廣州石門貪流矣廉介為二千石則不飲之昔吳隱之挹而不亂貪豈謂能汙其貞乎蓋亦惡其名也劉澄之謂為一涯溪通

四會殊為孟浪而不悉也庾仲初云嶠水南入始興溱水注海即黃岑水入武溪者也一清按黃岑曲紅碑作王禽北水入桂陽湘水注于大江即是水也右則千秋水注之水出西南萬歲山山有石室室中有鍾乳山上悉生靈壽木溪下即千秋水也水側民居號萬歲村其水下合黃水黃水又東北逕其縣東右合除泉水水出縣南湘陂村村有圓水廣圓可二百步一邊暖一邊冷冷處極清綠

亦謂之為貪泉飲者輒冒於財賄同於廣州石門貪流矣廉介為二千石則不飲之昔吳隱之挹而不亂貪豈謂能汙其貞乎蓋亦惡其名也劉澄之謂為一涯溪通四會殊為孟浪而不悉也庾仲初云嶠水南入始興溱水注海即黃岑水入武溪者也一清按黃岑曲紅碑作王禽北水入桂陽湘水注于大江即是水也右則千秋水注之水出西南萬歲山山有石室室中有鍾乳山上悉生靈壽木溪下即千秋水也水側民居號萬歲村其水下合黃水黃水又東北逕其縣東右合除泉水水出縣南湘陂村村有圓水廣圓可二百步一邊暖一邊冷冷處極清綠



淺則見石深則見底暖處水白且濁元素既殊涼暖亦  
 異厥名除泉其猶江乘之半湯泉也水盛則瀉黃溪水  
 耗則津涸輟流柳舊縣也桂陽郡治也漢高帝二年分  
 長沙置地理志曰桂水所出因以名也清按漢志桂陽郡無此語此是應註在桂陽縣下殆道元誤記也王莽更名南平縣曰宣風其城項羽  
 遷義帝所築也縣南有義帝冢內有石虎因呼為白虎  
 郡東觀漢記曰茨充字子何為桂陽太守民情懶少鹿  
 履足多剖裂茨教作履今江南知織履皆充之教也黃  
 溪東有馬嶺山高六百餘丈廣圓四十許里漢末有郡  
 民蘇耽栖遊此山桂陽列仙傳云耽郴縣人少孤養母

至孝言語虛無時人謂之癡常與眾兒共牧牛更直為  
 帥錄牛無散每至耽為帥牛輒徘徊左右不逐自還眾  
 兒曰汝直牛何道不走耶耽曰非汝曹所知即面辭母  
 云受性應仙當違供養涕泗又說年將大疫死者略半  
 穿一井飲水可得無恙如有哭聲甚哀後見耽乘白  
 馬還此山中百姓為立壇祠民安歲登民因名為馬嶺  
 山朱氏謀璋箋曰無恙以下有缺文洞神傳云耽初去時云今年大疫死者略半家中井水飲之無恙果如所言闔門元吉母年百餘歲終鄉人共葬之聞山上有  
人哭聲服除乃止神仙傳曰耽母既終葬後州東北牛脾山紫雲蓋上有號哭聲知蘇君之神因黃水又北流見白馬常在嶺上遂改牛脾山為白馬嶺  
 注于耒水謂之榔口耒水又西逕華山之陰亦曰華石



山孤峯特聳枕帶雙流東則黃溪耒水之交會也耒水東流沿注不得北過其縣西也兩岸連山石泉懸溜行者輒徘徊留念情不極已也

又北過便縣之西

縣故惠帝封長沙王子吳淺為侯國全氏曰按漢表以

日縣屬桂陽當從道元為是淺以惠帝元年封王莽之便屏也縣界有溫泉水

在郴縣之西北左右有田數千畝資之以溉常以十二月下種明年三月穀熟度此水冷不能生苗溫水所溉年可三登其餘波散流入于耒水也

又西北過耒陽縣之東

耒陽舊縣也蓋因水以制名王莽更名南平亭東傍耒水水東肥南有郡故城縣有溪水東出侯計山其水清澈冬溫夏冷西流謂之肥川川之北有盧塘塘池八頃其深不測有大魚常至五月輒一奮躍水湧數丈波襄四陸細魚奔迸隨水登岸不可勝計又云大魚將欲鼓作諸魚皆浮聚水側注西北逕蔡洲洲西即蔡倫故宅傍有蔡子池倫漢黃門順帝之世擣故魚網為紙用代簡素自其始也

又北過鄴縣東

縣有鄴湖湖中有洲洲上民居彼人資以給釀酒甚醇



水經注釋 耒水 沅水

美謂之酃酒歲常貢之湖邊尙有酃縣故城治此西北去臨承縣一十五里從省隸十三州志曰大別水南出耒陽縣太山北至酃縣入湖也

北入于湘

耒水西北至臨承縣而右注湘水謂之耒口也

沅水出茶陵縣上鄉西北過其縣西

水出江州安成郡廣興縣太平山西北流逕茶陵縣之

南名勝志衡州府酃縣下云沅水源出沅泉注水經云泉不常見遇邑政清明年穀豐稔其泉淅然如米泔瀑湧者舊相傳疾者飲此多愈今本無之一清按今酃縣本漢茶陵縣地宋嘉定四年置非漢之酃縣也漢武帝元朔四年封長沙定王子節侯訢之邑也一清按史表作

欣此從漢表師古曰訢與欣同王莽更名聲鄉矣沅水又屈而過其縣

西北流注也地理志謂之泥水者也

又西北過攸縣南

攸水出東南安成郡安復縣封侯山西北流逕其縣北

縣北帶攸溪蓋卽溪以名縣也漢武帝元朔四年封長沙定王子則爲攸輿侯一清按索隱曰按今長沙有攸縣本名攸輿乎表在南陽小司馬蓋本之酃注卽地理志所謂攸縣者也攸水又西南流入茶

陵縣入于沅水也

又西北過陰山縣南

縣本陽山縣也縣東北猶有陽山故城卽長沙孝王子



水經注釋

宗之邑也一清按漢表宗以元帝永光二年封形家言其勢王故塹山壘

谷改曰陰山縣一清按漢志桂陽郡有陽山縣又有陰山縣皆云侯國至續志有陰山無陽山

蓋東京省併之故應劭曰陽山今陰山也而師古以應說為非殆未詳考也宋志云陰山今漢舊縣屬桂陽吳

湘東郡有此疑是吳所立沈約所云亦非孫吳所立是湘東郡而度桂陽之陰山縣隸之故晉志湘東郡有陰

山縣陰山縣未嘗廢省何容復立乎縣上有容水自侯曇山下注洙水謂

之容口水有大穴容一百石水出於此因以名焉洙水

又西北逕其縣東又西逕歷口縣有歷水下注洙水謂

之歷口洙水又西北與洋湖水會水出縣西北樂藪罌

下洋湖湖去罌七里湖水下注洙謂之洋湖口洙水東

北有義山縣東北又有武陽龍尾山並仙者羽化之處

上有仙人及龍馬跡於其處得遺咏雖神栖白雲屬想

芳流藉念泉鄉遺咏在茲覽其餘誦依然息遠匪直邈

想霞蹤愛其文咏可念故端牘抽札以詮其咏其略曰

登武陽觀樂藪峩嶺千蕤洋湖口命蜚螭駕白駒臨天

水心踟躕千載後不知如蓋勝賞神鄉秀情超拔矣

又西北入于湘

漉水出醴陵縣東漉山西過其縣南

醴陵縣高后四年封長沙相侯越為國縣南臨淥水水

東出安城鄉翁陵山余謂漉淥聲相近後人藉便以淥

為稱雖翁陵名異而即麓是同

水經注釋 卷三十九 十一



屈從縣西北流至澧浦注入于湘

澧水出臨湘縣東南澧陽縣一清按澧陽縣本漢臨湘縣地孫吳析置以縣在澧水之

陽故名據此亦經文晚出之一證全祖望曰三國志周瑜傳以下雋漢昌澧陽州陵為奉邑則澧陽自漢末已有其名雖未為縣而已為邑西北過其縣東北與澧水合

澧水出縣東江州豫章縣首裨山

全祖望曰按顧祖禹曰今澧陽之大圍山

即首裨山其水曰白沙湖分四派一入袁之萬載一入分甯一入岳之中江其一即澧水予謂據顧說則經文所言是也善長誤以分甯之水當之不知首裨山不在豫章也導源西北流逕其縣南

縣憑溪以即名也又西北注于臨湘縣也

西入于湘

澧水出豫章艾縣

春秋左氏傳曰吳公子慶忌諫夫差不納居于艾是也  
王莽更名治翰

西過長沙羅縣西

羅子自枝江徙此世猶謂之為羅侯城也澧水又西流積而為陂謂之町湖也

又西至累石山入于湘水

累石山在北亦謂之五木山山方尖如五木狀故俗人藉以名之山在羅口北澧水又在羅水南流注于湘謂之東町口者也

澧水出豫章南壠縣西北過贛縣東

水經注釋

卷三十九 贛水



山海經曰贛水出聶都山東北流注于江入彭澤西也  
班固稱南壘縣彭水所發東入湖漢水庾仲初謂大庾  
嶠水北入豫章注于江者也地理志曰豫章水出贛縣  
西南而北入江蓋控引眾流總成一川雖稱謂有殊言  
歸一水矣故後漢郡國志曰贛有豫章水雷次宗云似  
因此水為其地名雖十川均流而此源最遠故獨受名  
焉劉澄之曰縣東南有章水西有貢水縣治二水之間  
二水合贛字因以名縣焉是為繆也劉氏專以字說水  
而不知遠失其實矣全氏曰按章貢圖經曰東江發源  
于汀州界之新樂山逕雩都而會  
于章水西江導源于大庾縣之聶都山與貢水合二水  
合而為贛則激之之言未可非也如善長所引山經及

庚說但有貢水而無章水恐未足以釋贛水之義也沈氏曰近世皆以豫章水為章水湖漢水為貢水所歷十入灘之險黃公灘為最即所謂惶恐灘也豫章水導源東北流逕南壘縣北

贛川石岨水急行難傾波委注六十餘里又北逕贛縣東縣即南康郡治晉太康五年分廬江立豫章水右會湖漢水水出雩都縣導源西北流逕金雞石其石孤竦臨水耆老云時見金雞出于石上故石取名焉湖漢水又西北逕贛縣東西入豫章水也

又西北過廬陵縣西

廬陵縣即王莽之桓亭也十三州志稱廬水西出長沙安復縣武帝元光六年封長沙定王子劉蒼為侯國即



王莽之思成也

一清按漢書地理志長沙國安成縣侯國續漢書郡國志無之蓋省併也吳復

置晉太康元年改曰安復王子侯表蒼封是安成非安復也

吳寶鼎中立以為安成

郡東至廬陵入湖漢水也

又東北過石陽縣西

漢和帝永平九年分廬陵立漢獻帝興平二年吳長沙

桓王立廬陵郡治此豫章水又逕其郡南城中有井其

水色半青半黃黃者如灰汁取作飲粥悉皆金色而甚

芬香

又東北過漢平縣南

一清按後漢中平中立漢平縣吳改曰吳平此亦經文晚出之證又

東北過新淦縣西

牽水西出宜春縣漢武帝元光六年封長沙定王子劉

成為侯國王莽之脩曉也牽水又東逕吳平縣舊漢平

也晉太康元年改為吳平矣一清按宋志吳平侯相吳更名牽水又東

逕新淦縣即王莽之偶亭而注于豫章水湖漢及贛並

通稱也又淦水出其縣下注于贛水

又北過南昌縣西

盱水出南城縣西北流逕南昌縣南西注贛水又有濁

水注之水出康樂縣故陽樂也一清按宋志康樂侯相吳孫權黃武中立曰陽

樂晉武帝太康元年更名濁水又東逕望蔡縣縣因汝南上蔡民萍

居此土晉太康元年改為望蔡縣一清按劉昭郡國志補注引豫章記日上



九經注釋卷三十九

蔡縣中平立此地名上蔡者上蔡民分徙濁水又東逕

建成縣漢武帝元光沈氏曰按本表是元朔四年封長沙定王子

劉拾為侯國王莽更名之曰多聚也縣出然石異物志

曰石色黃白而理疎以水灌之便熱以鼎著其上炊足

以熟置之則冷灌之則熱如此無窮元康中雷孔章入

洛賫石以示張公張公曰此謂然石於是乃知其名濁

水又東至南昌縣東流入于贛水贛水又歷白社西有

徐孺子墓吳嘉禾中太守長沙徐熙於墓隧種松太守

南陽謝景於墓側立碑永安中太守梁郡夏侯嵩於碑

傍立思賢亭松大合抱亭世修治至今謂之聘君亭也

贛水又北歷南塘塘之東有孺子宅際湖南小洲上孺

子名稚南昌人高尚不仕太尉黃瓊辟不就桓帝問尚

書令陳蕃徐稚袁閎誰為先後蕃答稱袁生公族不饒

自雕至於徐稚傑出薄域故宜為先桓帝備禮徵之不

至太原郭林宗有母憂稚往弔之置生芻於廬前而去

眾不知其故林宗曰必孺子也詩云生芻一束其人如

玉吾無德以堪之年七十二卒贛水又逕谷鹿洲即蓼

子洲也舊作大陂處贛水又北逕南昌縣故城西於春

秋屬楚即令尹子蕩師於豫章者也秦以為廬江南部

漢高祖六年始命陳嬰一清按下有脫文以為豫章郡治此即



陳嬰所築也王莽更名縣曰宜善郡曰九江焉劉歆云湖漢等九水入彭蠡故言九江矣陳蕃為太守署徐稚為功曹蕃在郡不接賓客唯稚來特設一榻去則懸之

此即懸榻處也建安中更名西安晉又名為豫章

漢及晉豫章郡治南昌晉志豫章郡領豫章縣劉昭郡國志補注引豫章記曰豫章縣建安立三國吳改曰西

安故晉志豫章郡有豫章縣蓋復漢之舊也晉志不言豫章宋志不記豫章均為脫漏且宋志云豫章太守領

豫甯侯相漢獻帝建安中立吳曰要安晉武帝太康元年更名要安又是西安之誤吳書太史慈傳數為寇于

艾西安是也城在今武甯縣西二十里前漢為海昏後漢為建昌縣地也南昌府城三百二十里非郡治也此

注言豫章郡治而釋以西安疑庸妄城之南門曰松陽人所填改觀下彭澤注却甚分明

門門內有樟樹高七丈五尺大二十五圍枝葉扶疎垂

蔭數畝應劭漢官儀曰豫章樟樹生庭中故以名郡矣

此樹嘗中枯逮晉永嘉中一旦更茂豐蔚如初咸以為

中宗之祥也禮斗威儀曰君政訟平豫樟常為生太興

中元皇果興大業于南故郭景純南郊賦云樊樟擢秀

于祖邑是也以宣王祖為豫章故也贛水北出際西北

歷度支步是晉度支校尉立府處步即水渚也贛水又

逕郡北為津步步有故守賈萌廟萌與安成侯張普爭

地為普所害即日靈見津渚故民為立廟焉

全氏曰賈

御覽引謝承後漢書謂是討莽而死又引安成記謂爭地而死然考之漢書王莽傳則是為莽九江太守拒漢

州牧守耶一清按寰宇記洪州南昌縣龍沙廟即西漢



未太守賈萌也萌與安成侯張普共謀誅王莽普反告  
 莽收萌而殺之時人咸嘆故為立廟祭之事更詳核尤  
 可與班書參異同也水之西岸有磐石謂之石頭津步之處也西  
 行二十里曰厭原山疊嶂四周杳邃有趣晉隆安末沙  
 門竺曇顯建精舍於山南僧徒自遠而至者相繼焉西  
 北五六里有洪井飛流懸注其深無底舊說洪崖先生  
 之井也北五六里有風雨池言山高瀨激激著樹木霏  
 散遠灑若雨西有鸞岡洪崖先生乘鸞所憩泊也岡西  
 有鵠嶺云王子喬控鵠所逕過也有二崖號曰大蕭小  
 蕭言蕭史所遊萃處也雷次宗云此乃繫風捕影之論  
 據實本所未辯聊記奇聞以廣井魚之聽矣又按謝莊

詩莊嘗遊豫章觀井賦詩言鸞岡四周有水謂之鸞陂

似非虛論矣東大湖十里二百二十六步北與城齊周氏

必大汎舟遊山錄云徐孺子亭在東湖徐宅名見水經  
 又乾道庚寅奏事錄云東湖徐孺子亭洪芻職乘云湖  
 在郡東南周廣五里鄺道元云十里一百二十步寰宇  
 記引雷次宗豫章記曰州城東有大湖北與城齊一清  
 按今文似有脫誤南緣迴折至南塘水通章江增減與江水同

漢永元中太守張躬築塘以通南路兼遏此水冬夏不  
 增減水至清深魚甚肥美每於夏月江水溢塘而過居  
 民多被水害至宋景平元年太守蔡君西起隄開塘為  
 水又東北逕王步側有城云是孫奮為齊王鎮此城



之渚今謂之王步蓋齊王之渚步也郡東南二十餘里  
 又有一城號曰齊王城築道相通蓋其離宮也贛水又  
 北逕南昌左尉廨西漢成帝時九江梅福為南昌尉居  
 此後福一旦捨妻子去九江傳云得仙一清按六贛水  
 又北逕龍沙西沙甚潔白高峻而陔有龍形連亘五里  
 中舊俗九月九日升高處也昔有人於此沙得故冢刻  
 碑題云西去江七里半筮言其吉卜言其凶而今此冢  
 垂沒於水所謂筮短龜長也贛水又逕椒邱城下建安  
 四年孫策所築也朱氏謀埠箋曰雷次宗豫章記云建  
 豫章太守華歆于郡下流一百四十里臨江築椒邱城  
 以備之一清按然則椒邱城非策所築其後策駐軍于

此以脅華歆遂以名之贛水又歷釣圻邸閣下度支校尉治太尉  
 陶侃移置此也舊夏月邸閣前洲沒去浦遠景平元年  
 校尉豫章因運出之力於渚次聚石為洲長六十餘丈  
 洲裏可容數十舫贛水又北逕鄖陽縣王莽之豫章縣  
 也餘水注之水東出餘汗縣王莽名之曰治干也餘水  
 北至鄖陽縣注贛水贛水又與鄖水合水出鄖陽縣東  
 西逕其縣南武陽鄉也地有黃金可采一清按漢志鄖  
 鄉右十餘里有黃金采師古曰陽縣下云武陽王莽改曰鄉亭孫權以  
 建安十五年分為鄖陽郡鄖水又西流注于贛又有繚  
 水入焉其水導源建昌縣漢元帝永光二年分海昏立



繚水東逕新吳縣漢中平中立繚水又逕海昏縣王莽  
更名宜生謂之上繚水又謂之海昏江分爲二水縣東  
津上有亭爲濟渡之要其水東北逕昌邑城而東出豫  
章大江謂之慨口昔漢昌邑王之封海昏也每乘流東  
望輒憤慨而還世因名焉其一水枝分別注入于脩水  
也

又北過彭澤縣西

脩水出艾縣西東北逕豫章縣故西安也晉太康元年  
更從今名脩水又東北逕永脩縣漢靈帝中平二年立  
脩水又東北注贛水其水總納十川同濬一瀆俱注于

彭蠡也

一清按漢志豫章郡彭蠡縣禹貢彭蠡澤在江西  
九江郡下應劭曰江自廬江尋陽分爲九全祖望曰郡  
國志云贛有豫章水雷次宗云十川均流此源最遠善  
長亦云贛水總納十川按漢志豫章郡贛縣下云贛水  
水出西南北入大江零都縣下云湖漢水東至彭澤入  
也其行千九百八十里卽注所謂豫章水右會湖漢水者  
成縣下云廬水東至廬陵下云彭水東入湖漢水所出西  
至新淦入湖漢新淦縣下應劭曰淦水所出西入湖漢  
南城縣下云盱水西至廬陵下應劭曰淦水所出西入湖  
水東至南昌入湖漢餘汗縣下云餘水在北至鄒陽入  
湖漢鄒陽縣下云鄒水西入湖漢艾縣下云脩水東北  
至彭澤入湖漢行六百六十里蓋十川者合湖漢水之  
經流而爲十也湖漢水源流最長次之則脩水今校之  
水經鄒水下多繚水則除湖漢水得十川一清按此是  
漢代之九江而非禹貢之九江禹貢之九江自當以洞  
庭爲據猶之三江班固地理志所云乃漢時現行之水  
道而于禹貢亦無與也



北入于江

大江南贛水總納洪流東西四十里而清潭遠漲綠波凝淨而會注于江川

廬江水出三天子都北過彭澤縣西北入于江

山海經三天子都一日天子鄣王彪之廬山賦敘曰廬山彭澤之山也雖非五嶽之數穹窿嵯峨實峻極之名山也孫放廬山賦曰尋陽郡南有廬山九江之鎮也臨彭蠡之澤接平敞之原開山圖曰山四方周四百餘里疊鄣之巖萬仞懷靈抱異苞諸仙迹豫章舊志曰廬俗字君孝本姓匡父東野王共鄱陽令吳芮佐漢定天下

而亡漢封俗於鄡陽曰越廬君俗兄弟七人皆好道術遂寓精爽於宮庭之山故世謂之廬山漢武帝南巡觀山以為神靈封俗大明公遠法師廬山記曰殷周之際匡俗先生受道仙人共遊此山一清按慧遠廬山記曰匡俗先生受道于仙人朱箋本作奚道仙人則似道號矣時人謂其所止為神矣乃受之謠當依續漢志注改正時人謂其所止為神仙之廬因以名山矣又按周景式曰廬山匡俗字子孝本東里子出周武王時生而神靈屢逃徵聘廬於此山時人敬事之俗後仙化空廬猶存弟子觀室悲哀哭之旦暮事同烏號世稱廬君故山取號焉斯耳傳之談非實證也故豫章記以廬為姓因廬以氏周氏遠師或託



廬墓為辭假憑虛以託稱二證既違三情互爽按山海經創志大禹記錄遠矣故海內東經曰廬江出三天子都入江彭澤西是曰廬江之各山水相依互舉殊稱明不因匡俗始正是好事君子強引此類用成章句耳又按張華博物志曹著傳其神自云姓徐受封廬山後吳猛經過山神迎猛猛語曰君王此山近六百年符命已盡不宜久居非據猛又贈詩云仰矚列仙館俯察王神宅曠載暢幽懷傾蓋付三益此乃神道之事亦有換轉理難詳矣吳猛隱山得道者也尋陽記曰廬山上有三石梁長數十丈廣不盈尺杳然無底吳猛將弟子登山

過此梁見一翁坐桂樹下以玉杯承甘露漿與猛又至一處見數人為猛設玉膏猛弟子竊一寶欲以來示世人梁即化如指猛使送寶還手牽弟子令閉眼相引而過其山川明淨風澤清曠氣爽節和土沃民逸嘉遯之士繼響窟巖龍潛鳳采之賢往者忘歸矣秦始皇漢武帝及太史公司馬遷咸升其巖望九江而眺鍾彭焉

水經主釋 卷三十九

字

按鍾彭謂石鍾山及彭蠡澤也今注無石鍾山之文而唐時李渤作記尚引水經并酈注其為缺失無疑也實宇記云南康軍都昌縣本漢彭蠡縣也石鍾山在縣北二百一十里西枕彭蠡連峰疊嶂壁立峭峻西南北面皆水四時如一白波撼山其聲若鍾因名之按辨石鍾山記云水經云彭蠡之口有石鍾山酈道元以為下臨深潭微風鼓浪水石相搏響若洪鍾因受其稱于幽棲者因尋繹東湖沿瀾窮此遂躋崖穿洞訪其遺踪次于



南隅忽遇雙石欹枕潭際影淪波中詢諸水濱乃曰石  
鍾也銅鐵之異焉扣而聆之南音胡北音清越  
止響騰餘韻徐歇若非澤滋其山乎乃知其英聯氣凝質  
發為至靈不然則安能產茲奇石乎斯名貫之聊刊前  
矣如善長之論則瀕流庶峰皆可以白鹿先生記白鹿  
繆畱遺將來貞元戊寅歲七月八日白鹿先生記白鹿  
先生姓李名渤字濬之隱廬山因所居洞為號後任  
江州刺史諫議大夫給事中桂管觀察使太和元年八  
月七日故吏湖口鎮將吳文忠公又反濬  
之說而廣善長之意作石鐘山記曰水經云彭蠡之  
口有石鍾焉酈道元以為石乎至唐李渤始訪其遺踪得  
相搏聲如洪鍾是說也人常疑之今以鐘磬置水中雖  
大風浪不能鳴也而況石乎至唐李渤始訪其遺踪得  
雙石于潭上扣而聆之南聲函胡北音清越枹之響騰  
餘韻徐歇自以為得之矣然是說也余尤疑之石之響  
然有聲者所在皆得之矣然是說也余尤疑之石之響  
六月丁丑余自齊安舟行適臨汝而長子邁將赴饒之  
德興尉送之湖口因得觀所謂石鍾者寺僧使小童持  
斧于亂石間擇其一扣之聲洪如鐘也扣之聲洪如鐘也  
至莫夜月明獨與邁乘小舟至絕壁下大石側立千仞

如猛獸奇鬼森然欲搏人而山上棲鶴聞人聲亦驚起  
磔磔雲霄間又有若老人欬且笑于山谷者或曰此鶴  
鶴也余方心動欲還而大聲發于水上噌吰如鐘鼓不  
絕舟人大恐徐而察之則山下皆石穴罅不知其深淺  
微波入焉涵澹澎湃而為此也舟迴至兩山間將入港  
口有大石當中流可坐百人空中而多竅與風水相吞  
吐有窾坎鏗鞳之聲與向之噌吰者相應如樂作焉因  
笑謂邁曰汝識之乎噌吰者周景王之無射也窾坎鏗  
鞳者魏獻子之歌鍾也古之人不余欺也事不目見耳  
聞而臆斷其有無可乎酈元之所見殆與余同而言之  
不詳士大夫終不肯以小舟夜泊絕壁之下故莫能知  
乃以斧斤考擊而求之自以為得其實余是以記之蓋  
歎酈元之簡而笑李渤之陋也劉氏獻廷廣陽雜記曰  
酈道元所謂石鍾山東坡泊舟于此作記者乃上石鍾  
也蓋石鍾山有二曰上石鍾下石鍾意善長每遇山水  
之佳趣僅傳數語不得若圖畫使人恍置身其間遇石鍾  
者廬山之北有石門水水出嶺端有雙石高竦其狀若  
矣廬山之北有石門水水出嶺端有雙石高竦其狀若



門因有石門之目焉水導雙石之中懸流飛澗近三百  
許步下散漫千許步上望之連天若曳飛練于霄中矣  
下有磐石可坐數十人冠軍將軍劉敬宣每登陟焉其  
水歷澗逕龍泉精舍南太元中沙門釋慧遠所建也其  
水下入江南嶺卽彭蠡澤西天子鄣也峰磴險峻人跡  
罕及嶺南有大道順山而下有若畫焉傳云匡先生所  
通至江道巖上有宮殿故墓者三以次而上最上者極  
于山峰山下又有神廟號曰宮亭廟故彭湖亦有宮亭  
之稱焉余按爾雅云大山曰宮何氏焯曰爾雅以大山  
宮小山爲句道元蓋誤  
一清按爾雅大山宮小山霍疏云宮猶圍繞也謂小山  
在中大山在外圍繞之山形若此者名霍非謂大山名

宮小山名霍也然卷末禹貢山水澤地所在霍山爲南  
嶽注引爾雅作大山宮小山曰霍則彼文仍是莫謂善  
長眞誤宮之爲名蓋起於此不必一由三宮也山廟甚  
神能分風擘流住舟遣使行旅之人過必敬祀而後得  
去故曹毗詠云分風爲二擘流爲兩昔吳郡太守張公  
直自守徵還一清按搜神記云張璞字公直  
不知何許人也爲吳郡太守道由廬山  
子女觀祠婢指女戲妃像人其妻夜夢致聘怖而遽發  
明引中流而船不行合船驚懼曰愛一女而合門受禍  
也公直不忍遂令妻下女於江其妻布席水上以其亡  
兄女代之而船得進公直方知兄女怒妻曰吾何面目  
于當世也復下已女於水中將渡遙見二女於岸側傍



有一吏立曰吾廬君主簿敬君之義悉還二女故干寶書之於感應焉山東有石鏡照水之所出有一圓石懸崖明淨照見人影晨光初散則延曜入石豪細必察故名石鏡焉又有二泉常懸注若白雲帶山廬山記曰白水在黃龍南卽瀑布也水出山腹挂流三四百丈飛湍林表望若懸素注處悉成巨井其深不測其水下入江湖廬山之南有上霄石高壁緬然與霄漢連接秦始皇三十六年嘆斯嶽遠遂記爲上霄焉上霄之南大禹刻石誌其丈尺里數今猶得刻石之號焉湖中有落星石周迴百餘步高五丈上生竹木傳曰有星墜此因以名

焉又有孤石介立大湖中周迴一里竦立百丈矗然高峻特爲瓌異上生林木而飛禽罕集言其上有玉膏可采所未詳也耆舊云昔禹治洪水至此刻石紀功或言秦始皇所勒然歲月已久莫能辨之也



水經注釋卷三十九終

海甯錢保塘  
華陽吳祖椿覆校

水經注釋卷四十

漸江水

斤江水

日南水

補弱水

補黑水

禹貢山水澤地所在

仁和趙一清誠夫錄

漸江水

一清按宋祁曰武陵有漸水東入沅疑此無漸水固也而未可以出三天子都

漸江一百五十里一名三王山祥符圖經云高五百五十仞

海經浙出郭璞曰三天子都山在新安歙縣東今謂之

以此山名也其傍寰宇記曰大鄣山吳越於此分界葉夢

得避暑錄話曰水經謂漸江出三天子都取山江海經為證

三彭澤來蓋眾江所會不應獨取此一水子意漸字即浙

字水經誤分爲二名注引漢志浙江者已今自分水縣

水經注釋卷四十



水經注卷之二十一 浙江水  
出桐廬號歙港者與衢婺之溪合而過富陽以入大江大  
江自西來此江自東來皆會於錢塘按山海經三天子鄣  
有三一曰在閩西海北即浙江之源也郭景純云今在新  
安歙縣東謂之三王山浙江出其傍者也一日在衡山即  
廬江之源也漢人以霍山為衡山所謂在彭澤者也一日  
在海中則不知其處說者曰匡廬是西鄣徽是東北鄣  
婺之永陽亦有三天子鄣是南鄣其說當存而不論若石  
林謂但在彭澤則謬矣又謂錢塘乃北江下流來自彭澤  
是仍水經沔水篇以立文者然三天子鄣雖有三而大鄣  
則推浙江之源秦漢間人以是取郡名為鄣郡是彭澤  
所能爭也

### 山海經謂之浙江也

一清按史記索隱曰韋昭云浙江在今錢唐浙音折晉灼音逝非也

蓋其流曲折莊子所謂制地理志云水出丹陽黟縣南

### 蠻夷中

一清按顏師古注漢書引地理志作漸與道元所見之本作浙江者異見高惠高后文功臣表

全祖望曰按王應麟云唐盧潘引地理志作浙江出黟縣南率山東今觀是注所引則唐本為誤也而新安人

作志乘以為山經之文有率山率水之目不知山經無  
此說山海經曰浙江出三天子都在其東郭景純曰出  
新安黟縣南蠻中此與漢志水經合當東漢時新安一  
帶山越居之班志謂之蠻夷今以蠻為率則誣甚矣率  
山率水不見他書太平御覽云率即歙耳亦混語也寰  
宇記始收其目而九域志仍不及焉以羅存齋程篁墩  
職志事尚不北逕其縣南有博山山上有石特起十丈  
能辨正何也  
上峯若劍杪時有靈鼓潛發正長臨縣以山鼓為候一  
鳴官長一年若長雷發聲則官長不反浙江又北歷黟  
山縣居山之陽故縣氏之漢成帝鴻嘉二年以為廣德  
國封中山憲王孫雲客王於此晉太康中以為廣德縣  
分隸宣城郡會稽陳業潔身清行遯跡此山浙江又北  
逕歙縣東與一小谿合水出縣東北翁山西逕故城南



又西南入浙江又東逕遂安縣南谿廣二百步上立杭以相通水甚清深潭不掩鱗故名新定分歙縣立之晉太康中又改從今名浙江又左合絕谿谿水出始新縣西東逕縣故城南爲東西長谿谿有四十七瀨濬流驚急奔波聒天孫權使賀齊討黠歙山賊賊固黠之林厯山山甚峻絕又工禁五兵齊以鐵杙椽山升出不意人以白梃擊之氣禁不行遂用奇功平賊於是立始新之府於歙之華鄉令齊守之後移出新亭晉太康元年改曰新安郡谿水東注浙江浙江又東北逕建德縣南縣北有烏山山下有廟廟在縣東七里廟渚有大石高十

丈圍五尺水瀨濬激而能致雲雨浙江又東逕壽昌縣南自建德至此八十里中有十二瀨瀨皆峻嶮行旅所難縣南有孝子夏先墓先少喪二親負土成墓數年不勝哀卒浙江又北逕新城縣桐谿水注之水出吳興郡於潛縣北天目山山極高峻崖嶺竦疊西臨浚澗山上有霜木皆是數百年樹謂之翔鳳林東面有瀑布下注數畝深沼名曰浣龍池池水南流逕縣西爲縣之西谿谿水又東南與紫谿合水出縣西百丈山卽潛山也山水東南流名爲紫谿中道夾水有紫色磐石石長百餘丈望之如朝霞又名此水爲赤瀨蓋以倒影在水故也



紫谿又東南流逕白石山之陰

一清按吳越春秋曰南

經曰新安縣南白石山名廣

陽山水曰赤岸水今本無之山甚峻極北臨紫谿又東

南連山夾水兩峯交峙反項對石往往相捍十餘里中

積石磊砢相挾而上澗下白沙細石狀若霜雪水木相

映泉石爭暉名曰樓林紫谿又東南流逕桐廬縣東為

桐谿孫權藉谿之名以為縣目割富春之地立桐廬縣

自縣至於潛凡十有六瀨第二是嚴陵瀨瀨帶山山下

有石室漢光武帝時嚴子陵之所居也故山及瀨皆即

人姓名之山下有磐石周迴十數丈交枕潭際蓋陵所

游也桐谿又東北逕新城縣入浙江縣故富春地孫權

置後省并桐廬咸和九年復立為縣浙江又東北入富

陽縣故富春也晉后名春改曰富陽也東分為湖浦浙

江又東北逕富春縣南縣故王莽之誅歲也江南有山

孫武皇之先所葬也漢末墓上有光如雲氣屬天黃武

四年孫權以富春為東安郡分置諸縣以討山越命全

琮一清按三國志吳書孫權傳事在黃武五年秋七月

浙江又東北逕亭山西山

上有孫權父冢一清按吳書孫策傳云堅薨還葬曲阿

孫權傳云吳高陵松柏斯拔高陵堅守

名吳地記云堅墓在盤門內何焯曰參以謝詢請置守

冢之文則文臺定葬吳也許彥周詩話云今注所云得無

夔在姑蘇時盜發孫堅冢楊作詩云今注所云得無

因孫鍾墓而誤耶鍾因種瓜得墓地事備幽明錄又按

劉昭郡國志補注吳本國下引皇覽曰縣東門外孫武

冢蓋春秋時人後人或指此訛為堅墓則陳壽志還葬

水經注卷四十一



大經注釋 卷四十一  
曲阿之說未可非也道元指富春所葬為孫權父墓尤  
誤當是孫堅父鍾孫亮立廟稱曰太祖者而幽明錄沈  
約宋書謂以鍾為堅之祖恐不如劉  
敬叔異苑以鍾是堅父之確當也

### 北過餘杭東入於海

浙江逕縣左合餘杭大谿江北即臨安縣界水北對郭  
文宅宅傍山面谿宅東有郭文墓晉建武元年驃騎王  
導迎文置之西園文逃此而終臨安令改葬之建安十  
六年縣民郎稚作亂賀齊討之孫權分餘杭立臨水縣  
晉改曰臨安縣因岡為城南門尤高謝安泣郡遊縣逕  
此門以為難為亭長浙江又東逕餘杭故縣南新縣北  
秦始皇南遊會稽途出是地因立為縣王莽之淮睦也

漢末陳渾移築南城縣後谿南大塘即渾立以防水也  
縣南有三碑是顧颺范甯等碑縣南有大壁山郭文自  
陸渾遷居也浙江又東逕烏傷縣北王莽改曰烏孝郡  
國志謂之烏傷異苑曰東陽顏烏以淳孝著聞後有羣  
烏銜土集顏烏所居之邨烏口皆傷一境以為顏烏至  
孝故致慈烏欲令孝聲遠聞又名其縣曰烏傷矣浙江  
又東北流至錢塘縣穀水入焉水源西出太末縣縣是  
越之西部姑蔑之地也全氏曰漢時方有分部而西部  
亦不在姑蔑東京分部西部始  
在姑蔑耳春秋戰國時不當以秦以為縣王莽之末治  
西部目之西部或是西部之誤  
也一清按黃本作末理  
猶仍唐人寫本之舊吳寶鼎中分會稽立隸東陽郡



穀水東逕獨松故冢下冢爲水毀其塼文筮言吉龜言  
凶百年墮水中今則同龜繇矣穀水又東逕長山縣南  
與永康谿水合縣卽東陽郡治也縣漢獻帝分烏傷立  
郡吳寶鼎中分會稽置城居山之陽或謂之長仙縣也  
言赤松采藥此山因而居之故以爲名後傳呼乖謬字  
亦因改谿水南出永康縣赤烏中分烏傷上浦立劉  
敬叔異苑曰孫權時永康縣有人入山遇一大龜卽束  
之以歸龜便言曰游不量時爲君所得擔者怪之載出  
欲上吳王夜宿越里纜船於大桑樹宵中樹忽呼龜曰  
元緒奚事爾也龜曰行不擇日今方見烹雖盡南山之

樵不能潰我樹曰諸葛元遜識性淵長必致相困令求  
如我之徒計將安泊龜曰子明無多辭旣至建業權將  
煮之燒柴萬車龜猶如故諸葛恪曰然以老桑乃熟獻  
人仍說龜言權使伐桑取煮之卽爛故野人呼龜曰元  
緒其水飛湍北注至縣南門入穀水穀水又東定陽谿  
水注之水上承信安縣之蘇姥布縣本新安縣晉武帝  
太康三年改曰信安水懸百餘丈瀨勢飛注狀如瀑布  
瀨邊有石如牀牀上有石牒長三尺許有似雜采帖也  
東陽記云信安縣有縣室坂晉中朝時有民王質伐木  
至石室中見童子四人彈琴而歌質因畱倚柯聽之童



子以一物如棗核與質質舍之便不復飢俄頃童子曰  
 其歸承聲而去斧柯漙然爛盡既歸質去家已數十年  
 親情凋落無復向時比矣其水分納眾流混波東逝逕  
 定陽縣夾岸緣谿悉生支竹及芳枳木連襍以霜菊金  
 橙白沙細石狀如凝雪石榴湍波浮響無輟山水之趣  
 尤深人情縣漢獻帝分信安立溪亦取名焉谿水又東  
 逕長山縣北北對高山山下水際是赤松羽化之處也  
 炎帝少女追之亦俱仙矣後人立廟於山下一清按太平御覽引  
水經注曰赤松澗在東陽赤松子遊金華山以火自燒而化故山上有赤松子之祠澗自山出故曰赤松澗今本無  
 谿水又東入於穀水穀水又東逕烏傷縣之雲黃

山山下臨溪水水際石壁傑立高一百許丈又與吳甯  
 谿水合水出吳甯縣下逕烏傷縣入穀謂之烏傷谿水  
 閩中有徐登者女子化爲丈夫與東陽趙昞竝善越方  
 時遭兵亂相遇於谿各示所能登先禁谿水爲不流昞  
 次禁枯柳柳爲生黃二人相視而笑登年長昞師事之  
 後登身故昞東入章安百姓未知昞乃升茅屋梧鼎而  
 爨主人驚怪昞笑而不應屋亦不損又嘗臨水求渡船  
 人不許昞乃張蓋坐中長嘯呼風亂流而濟於是百姓  
 神服從者如歸章安令惡而殺之民立祠於永甯而蚊  
 蚋不能入昞秉道懷術而不能全身避害事同萇宏宋



元之龜厄運之來故難救矣穀水又東入錢唐縣而左入浙江故地理志曰穀水自太末東北至錢唐入浙江是也浙江又東逕靈隱山山在四山之中有高崖洞穴左右有石室三所又有孤石壁立大三十圍其上開散狀似蓮花昔有道士長往不歸或因以稽留為山號山下有錢塘故縣浙江逕其南王莽更名之曰泉亭地理志曰會稽西部都尉治錢唐記曰海防大塘在縣東一里許郡議曹華信家議立此塘以防海水始開幕有能致一斛土者即與錢一千旬月之間來者雲集塘未成而不復取於是載土石者皆棄而去塘以之成故改名

錢塘焉一清按武林水因武林山泉瀦而為湖舊湖水通江後人築塘以隔江湖泉與錢通用王莽改錢唐為泉亭關駟曰山出錢水可證也故湖曰錢湖江曰錢江皆以一塘分限得名華信築塘與錢之事蓋出於傳記之縣南江側有明聖湖父老傳言湖有金牛古悠繆耳見之神化不測湖取名焉縣有武林山武林水所出也

關駟云山出錢水東入海全氏曰漢志會稽郡錢唐縣武林山在錢唐縣治西五里武水東入海是也錢唐江而東趣龕赫以達于海不然不得云東入也計其里數不及二百何云八百三十里耶一清按說文有漸江又有浙江云江水東至山陰為浙江則駟縣之漸江至錢唐乃有浙江名班志有浙江無漸江浙江下但云東入海不計道里之數至錢唐武林水亦云東入海行入百三十里補此一句以見浙江之即漸江也武林水既入於江則是合江流而東入於海推本源流所行恰吳地記言縣唯浙江今無此有於數亦非孟堅誤記也



水

一清按武林水即錢水今杭人所謂西湖者是陸氏之說始不識眉目之言也

縣東有包定

諸山皆西臨浙江水流於兩山之閒江川急濬兼濤水晝夜再來來應時刻常以月晦及望尤大至二月八月最高峨峨二丈有餘吳越春秋以爲子胥文種之神也昔子胥亮於吳而浮尸於江吳人憐之立祠於江上名曰胥山吳錄曰胥山在太湖邊去江不百里故曰江上文種誠於越而伏劍於山陰越人哀之葬於種山文種既葬一年子胥從海上負種俱去游夫江海故潮水之前揚波者伍子胥後重水者大夫種是以枚乘曰濤無記焉然海水上潮江水逆流似神而非於是處焉秦始

皇三十七年將遊會稽至錢唐臨浙江所不能渡故道餘杭之西津也浙江北合詔息湖湖本名胙湖因秦始皇帝巡狩所憩故有詔息之名也浙江又東合臨平湖異苑曰晉武時吳郡臨平岸崩出一石鼓打之無聲以問張華華曰可取蜀中桐材刻作魚形扣之則鳴矣於是如言聲聞數十里劉道民詩曰事有遠而合蜀桐鳴吳石傳言此湖草蕝壅塞天下亂是湖開天下平孫皓天璽元年吳郡上言臨平湖自漢末蕝塞今更開通又於湖邊得石函函中有小石青白色長四寸廣二寸餘刻作皇帝字於是改天冊爲天璽元年孫盛以爲元皇



中興之符徵五湖之石瑞也錢塘記曰桓元之難湖水

全氏曰臨平湖在浙

色赤熒熒如丹湖水上通浦陽江下注浙江

江之西不得越浙江而通浦陽江若云上通南江則善矣一清按此文之誤與沔水篇注正同即此一句乃知南江與浙江合之證

名曰東江行旅所從以出浙江也浙江又東

逕禦兒鄉萬善厯曰吳黃武六年正月獲彭綺是歲由

拳西鄉有產兒墮地便能語云天方明河欲清鼎腳折

金乃生因是詔為語兒鄉非也禦兒之名遠矣蓋無智

之徒因藉地名生情穿鑿耳國語曰句踐之地北至禦

兒是也安得引黃武證地哉韋昭曰越北鄙在嘉興浙

江又東逕柴辟南舊吳楚之戰地矣備候於此故謂之

辟塞是以越絕稱吳故從由拳辟塞渡會稽溱山陰是

也浙江又逕固陵城北昔范蠡築城於浙江之濱言可

以固守謂之固陵今之西陵也浙江又東逕祖塘謂之

祖瀆昔太守王朗拒孫策數戰不利孫靜果說策曰朗

負阻城守難可卒拔祖瀆去此數十里是要道也若從

湖亦謂之西城湖湖西有湖城山東有夏架山

志刊誤曰當作東有湖城山西有夏架山

皋谿而下注浙江又逕會稽山陰縣有苦竹里里有舊

城言句踐封范蠡子之邑也浙江又東與蘭谿合湖南



有天柱山湖口有亭號曰蘭亭亦曰蘭上里太守王羲之謝安兄弟數往造焉吳郡太守謝勗封蘭亭侯蓋取此亭以爲封號也太守王廙之移亭在水中晉司空何無忌之臨郡也起亭於山椒極高盡眺矣亭宇雖壞基陛尙存浙江又逕越王允常冢北冢在木客村耆彥云句踐使工人伐檠楯欲以獻吳久不得歸工人憂思作木客吟後人因以名地句踐都瑯琊欲移允常冢冢中生分風飛沙射人人不得近句踐謂不欲遂止浙江又東北得長湖口湖廣五里東西百三十里沿湖開水門六十九所下漑田萬頃北瀉長江湖南有覆斗山周五

百里北連鼓吹山山西枕長谿谿水下注長湖山之西嶺有賀臺越入吳還而成之故號曰賀臺矣又有秦望山在州城正南爲眾峯之傑陟境便見史記云秦始皇登之以望南海自平地以取山頂七里懸磴孤危徑路險絕記云扳蘿捫葛然後能升山上無甚高木當由地迴多風所致山南有嵯峴峴裏有大城越王無餘之舊都也故吳越春秋云句踐語范蠡曰先君無餘國在南山之陽社稷宗廟在湖之南又有會稽之山古防山也亦謂之爲茅山又曰棟山越絕云棟猶鎮也蓋周禮所謂揚州之鎮矣山形四方上多金玉下多珠石山海經



曰勺水出焉南流注於溟吳越春秋稱覆釜山之中有金簡玉字之書黃帝之遺讖也山下有禹廟廟有聖姑象禮樂緯云禹治水畢天賜神女聖姑即其像也山上有禹冢昔大禹即位十年東巡狩崩於會稽因而葬之有鳥來為之耘春拔草根秋啄其穢是以縣官禁民不得妄害此鳥犯則刑無赦山東有湮井去廟七里深不見底謂之禹井云東遊者多探其穴也秦始皇登稽山刻石紀功尚存山側孫暢之述書云丞相李斯所篆也又有石匱山石形似匱上有金簡玉字之書言夏禹發之得百川之理也又有射的山遠望山的狀若射侯故

謂射的射的之西有石室名之為射堂年登否常占射的以為貴賤之準的明則米賤的闇則米貴故諺云射的白斛米百射的元斛米千北則石帆山山東北有孤石高二十餘丈廣八丈望之如帆因以為名北臨大湖水深不測傳與海通何次道作郡常於此水中得烏賊魚南對精廬上蔭修木下瞰寒泉西連稽山皆一山也

東帶若邪溪吳越春秋所謂歐冶涸以成五劍

傳記寶劍曰當此造劍之時赤堇之山破而出錫若邪之溪涸而出銅赤堇山在今甯波府奉化縣東五十里漢取山名以氏縣曰鄞縣漢志會稽郡鄞縣下云有鎮亭有鮫埼亭東南有海門水入海有越天門山鎮亭山一名在奉化縣西南百里勢極高天門山在縣南六十里一名在樓門濱裏港海兩峯對峙勢若插天天門水即







其閒有炭瀆句踐臣吳吳王封句踐於越百里之地東至炭瀆是也縣南九里有侯山山孤立長湖中晉車騎將軍孔敬康少時遯世栖跡此山全氏曰孔愉棄官居山陰不得言是少時湖北有三小山謂之鹿野山在縣南六里按吳越春秋越之麋苑也山有石室言越王所遊息處矣縣南湖北有陳音山楚之善射者曰陳音越王問以射道又善其說乃使簡士習射北郊之外按吳越春秋音死葬於國西山上今陳音山乃在國南五里湖北有射堂及諸邸舍連衍相屬又於湖中築塘直指南山北即大越之國秦改爲山陰縣會稽郡治也太史公曰禹會諸侯計於

此命曰會稽者會計也始以山名因爲地號夏后少康

封少子杼以奉禹祠爲越

全氏曰按夏人報杼乃夏后之賢者豈以支子分封奉祠

哉史記越世家亦不云是后杼也

世歷殷周至於允常列於春秋允常

卒句踐稱王都於會稽吳越春秋所謂越王都埠中在

諸暨北界山陰康樂里有地名邑中者是越事吳故北

其門以東爲右西爲左故雙闕在北門外闕北百步有

雷門門樓兩層句踐所造時有越之舊木矣州郡館宇

屋之大瓦亦多是越時故物

全氏曰按此即王十朋賦所云雙杉廳是越故物者

也句踐霸世徙都瑯琊後爲楚伐始還浙東城東郭外

有靈汜下水甚深舊傳下有地道通於震澤又有句踐



所立宗廟在城東明里中甘滂南又有玉笥竹林雲門  
天柱精舍竝疏山創基架林裁宇割澗延流盡泉石之  
好水流逕通浙江又北逕山陰縣西西門外百餘步有  
怪山本瑯琊郡之東武縣山也飛來徙此壓殺數百家  
吳越春秋稱怪山者東武海中山也一名自來山百姓  
怪之號曰怪山亦云越王無疆爲楚所伐去瑯琊山東  
武人隨居山下遠望此山其形似龜故亦有龜山之稱  
也越起靈臺於山上又作三層樓以望雲物川土明秀  
亦爲勝地故王逸少云從山陰道上猶如鏡中行也浙  
江之上又有大吳王小吳王邨竝是闔閭夫差伐越所

舍處也今悉民居然猶存故目昔越王爲吳所敗以五  
千餘眾栖於稽山卑身待士施必及下呂氏春秋曰越  
王之栖於會稽也有酒投江民飲其流而戰氣自倍所  
投卽浙江也許慎晉灼竝言江水至山陰爲浙江江之  
西岸有朱室塢句踐百里之封西至朱室謂此也浙江  
又東北逕種山西大夫文種之所葬也山上有白樓亭  
亭本在山下縣令殷朗移置今處浦國桓儼避地會稽  
聞陳業履行高潔往候不見儼後浮海南入交州臨去  
遺書與業不因行李繫白樓亭柱而去升陟遠望山湖  
滿目也永建中陽羨周嘉上書以縣遠赴會至難求得



分置遂以浙江西為吳以東為會稽漢高帝十二年亦  
吳也全氏曰按高帝六年會稽郡屬荆王賈國中十二年屬吳王濞國中故曰亦吳也景帝四年始以郡屬天後分為三世號三吳吳郡吳興郡會稽其一焉又

逕永興縣南縣在會稽東北一百二十里也闔閭弟夫  
槩之故邑也一清按此是應劭說而顏師古非之然吳代越封句踐以百里之地則或取其餘地以封夫槩未可知也王莽之餘衍也漢末童謠云天子當興東南

三餘之間一清按永興故漢之餘暨與餘姚餘杭而為三故曰三餘也故孫權改曰  
永興縣濱浙江又東合浦陽江江水又導源烏傷縣又  
東逕諸暨縣與洩谿合谿廣數丈中道有兩高山夾谿  
造雲壁立凡有五洩下洩懸三十餘丈廣十丈中三洩

不可得至登他山遠望乃得見之懸百餘丈水勢高急  
聲震水外上洩懸二百餘丈望若雲垂此是瀑布土人  
號為洩也江水又東逕諸暨縣南縣臨對江流江南有

射堂縣北帶烏山故越地也夫槩王之故邑一清按漢志之餘暨

吳更名永興應劭云夫槩之所邑即今之蕭山縣也又諸暨莽曰疏虜不云是夫槩邑注上文于永興縣下已引應說此又復出豈誤諸暨為餘暨乎先名上諸暨亦曰句無矣故國語

曰句踐之地南至句無王莽之疏虜也夾水多浦浦中  
有大湖春夏多水秋冬涸淺江水又東南逕剡縣與白  
石山水會山上有瀑布懸水三十丈下注浦陽江浦陽  
江水又東流南屈又東迴北轉逕剡縣東王莽之盡忠



也縣開東門向江江廣二百餘步自昔耆舊傳縣不得  
 開南門開南門則有賊盜江水翼縣轉注故有東渡西  
 渡焉東南二渡通臨海並汎單船爲浮航西渡通東陽  
 併二十五船爲橋航江邊有查浦浦東行二百餘里與  
 句章接界浦裏有六里有五百家並夾浦居列門向水  
 甚有良田有青谿餘洪谿大發谿小發谿江上有六谿  
 六谿裂溉入江一清按漢志會稽郡句章縣渠水東入海全氏曰即六谿之水也凡言渠水必皆以人力爲之句章之渠水亦是居民苦江湖之斥鹵而引山溪之水爲渠以利田溉是即所謂渠水者矣蓋六谿皆簞谿之支流簞谿入浦陽而此六谿者瀦而爲渠遂獨擅句章之望雖于前記無明文然舍此六谿更無水以夾谿上下崩崖若傾東有簞山南有黃山與白當之矣

石三山爲縣之秀峯山下眾流前導湍石激波浮嶮四  
 注浦陽江又東逕石橋廣八丈高四丈下有石井口徑  
 七尺橋上有方石長七尺廣一丈二尺橋頭有磐石可  
 容二十人坐谿水兩傍悉高山山有石壁二十許丈谿  
 中相攻轟響外發未至橋數里便聞其聲江水北逕岷  
 山山下有亭亭帶山臨江松嶺森蔚沙渚平淨浦陽江  
 又東北逕始甯縣嶧山之成功嶠嶠壁立臨江敲路峻  
 狹不得併行行者牽木稍進不敢俯視嶠西有山孤峯  
 特上飛禽罕至嘗有采藥者沿山見通谿尋上於山頂  
 樹下有十二方石地甚光潔還復更尋遂迷前路言都



仙之所憩讌故以壇讌名山嶠北有嶧浦浦口有廟廟甚靈驗行人及樵伐者皆先敬焉若相侵竊必爲蛇虎所傷北則嶧山與岷山接二山雖曰異縣而峯嶺相連其閒傾瀾懷煙泉谿引霧吹畦風馨觸岫延賞是以王元琳謂之神明境事備謝康樂山居記浦陽江自嶧山東北逕太康湖車騎將軍謝元田居所在右濱長江左傍連山平陵修通澄湖遠鏡於江曲起樓樓側悉是桐梓森聳可愛居民號爲桐亭樓樓兩面臨江盡升眺之趣蘆人漁子汎濫滿焉湖中築路東出趣山路甚平直山中有三精舍高薨凌虛垂簷帶空俯眺平林煙杳在

下水陸甯晏足爲避地之鄉矣江有琵琶圻圻有古冢墮水甃有隱起字云筮吉龜凶八百年落江中謝靈運取甃詣京咸傳觀焉乃如龜繇故知冢已八百年矣浦陽江又東北逕始甯縣西本上虞之南鄉也漢順帝永建四年陽羨周嘉上書始分之舊治水西常有波潮之患晉中興之初治今處縣下有小江源出岫山謂之岫浦逕縣下西流注於浦陽菴山下注此浦浦西通山陰浦而達於江江廣百丈狹處二百步高山帶江重蔭被水江闊漁商川交樵隱故桂棹蘭橈望景爭途江南有故城太尉劉牢之討孫恩所築也

全氏曰按劉牢之終于鎮北將軍其討孫



恩時為會稽五江水東逕上虞縣南王莽之會稽也本

部都督非太尉司鹽都尉治也地名虞賓晉太康地記曰舜避丹朱於

此故以名縣百官從之故縣北有百官橋亦云禹與諸

侯會事訖因相虞樂故曰上虞二說不同未詳孰是

清

按釋名曰吳虞也封泰伯于此以虞

其志即虞樂之義古娛虞通用也縣南有蘭風山山

少木多石驛路帶山傍江路邊皆作欄干山有三嶺枕

帶長江茗茗孤危望之若傾緣山之路下臨大川皆作

飛閣欄干乘之而渡謂此三嶺為三石頭丹陽葛洪遯

世居之基井存焉瑯琊王方平性好山水又爰宅蘭風

垂釣於此以永終朝行者過之不識問曰賣魚師得魚

賣否方平答曰釣亦不得復不賣亦謂是水為上虞

江縣之東郭外有漁浦湖中有大獨小獨二山又有覆

舟山覆舟山下有漁浦王廟廟今移入裏山北三山孤

立水中湖外有青山黃山澤蘭山重岫疊嶺參差入雲

澤蘭山頭有深潭山影臨水水色青綠山中有諸塢有

石槌一所右臨白馬潭潭之深無底傳云創湖之始邊

塘屢崩百姓以白馬祭之因以名水湖之南即江津也

江南有上塘陽中二里隔在湖南常有水患太守孔靈

符遏蠡山前湖以為埭埭下開瀆直指南津又作水槌

二所以舍此江得無淹潰之害縣東有龍頭山山崖之



閒有石井冬夏常冽清泉南帶長江東連上陂江之道南有曹娥碑娥父盱迎濤溺死娥時年十四哀父尸不得乃號踴江介因解衣投水祝曰若值父尸衣當沈若不值衣當浮裁落便沈娥遂於沈處赴水而死縣令度尚使外甥邯鄲子禮為碑文以彰孝烈江濱有馬目山洪濤一上波隱是山勢淪岫亭閒歷數縣行者難之縣東北亦有孝子楊威母墓威少失父事母至孝常與母入山采薪為虎所逼自計不能禦於是抱母且號且行虎見其情遂弭耳而去是非誠貫精微孰能理感於英獸矣又有吳瀆破山導源注於胥江上虞江東逕周市

而注承輿地理志曰縣有仇亭柯水東入海仇亭在縣

之東北一十里江北柯水疑即江也又東北逕永興縣

東與浙江合謂之浦陽江地理志又云縣有蕭山潘水

所出東入海一作潛水劉良注作漢水皆潘字之誤又

疑是浦陽江之別名也自外無水以應之

鳥分子諸暨是為曹娥錢清二口其自義烏山南出者道由蒿壩所謂東小江也下流斯為曹娥其自山北出者道由義橋所謂西小江也下流斯為錢清考浦陽之名漢時所未有故班志不錄然志于浦陽東道之水則曰柯水而係之上虞即曹娥也西道之水則有潘水而係之餘暨即錢清也續志有潘水而失柯水至韋昭始以浦陽為三江之一六朝時合曹娥錢清二江總曰浦陽故謝康樂山居賦所云皆指曹娥而南史爭戰之地則皆在錢清唐五代作志乘者尚無曹娥錢清之名故九域志以曹娥鎮屬會稽錢清鎮屬山陰可證也



元注水經以上虞江稱曹娥而錢清則否是知曹娥為浦陽江經流無疑矣觀南史浦陽江南北各有埭司以稽察行旅胡梅磻曰浦陽江南津埭即今之梁湖堰北津埭即今之曹娥堰與西陵埭浦埭稱四埭六朝官制班固足與水道相證明蓋浦陽之水東行者當隄堰未與之日直自餘姚達于句章之境非猶夫今之曹娥也道元言之不明遂啓後人之疑

浙江又東注于海故山海經曰浙江在其東在閩西北入海韋昭以松江浙江浦陽江為三江

斤江水出交趾龍編縣東北至鬱林領方縣東注于鬱

地理志云逕臨塵縣至領方縣注于鬱

容容夜緬湛乘牛渚須無無濡營進皇無地零侵黎

侵黎水出廣州晉興郡郡以太康中分鬱林置行至臨

塵入鬱

一清按漢志鬱林郡臨塵縣下云又有侵離水行七百里亦見溫水注云逕臨塵入領方注鬱

無會重瀨夫省無變

一清按無變見溫水注

由蒲王都融勇外此皆

出日南郡西東入於海

容容水在南垂名之以次轉北也右三十水從江已南

至日南郡也

一清按自容容以下文義難曉今以雙字數之得十七水耳而注云三十水豈有脫

文即漢志日南郡下云有小水十六并行三千一百八十里屬交州稍為近之全氏曰漢志日南郡西捲縣下云水入海則西捲亦水名西捲水見溫水注

補弱水

禹貢錐指曰弱水經不言所出桑欽以為出張掖刪丹縣鄭康成曰眾水東流此獨西流而水經注無之其所



經入不可得而詳也一清按史記索隱曰水經曰弱水出張掖刪丹縣西北至酒泉會水縣入合黎山腹漢志張掖郡刪丹縣桑欽以為導弱水自此西至酒泉合黎即是小司馬所引之文是唐時尚有弱水篇今本盡失之耳張守節正義亦云合黎水出臨松縣東而北流逕張掖故城下又北流至縣北二十三里合弱水弱水自合黎山折而北流逕沙磧之西入居延澤行千五百里又漢志金城郡臨羌縣下云有弱水說文曰弱水自張掖刪丹西至酒泉合黎餘波入於流沙觀此則弱水之源委約略可得矣又曰岨山也或曰弱水之所出十六

國春秋乞伏札子擊吐谷渾覓地於弱水西元和志弱水在刪丹縣南山下括地志蘭門山一名窮石在刪丹縣西南七十里離騷夕次於窮石淮南子弱水出窮石山是也隋書地理志刪丹縣有祀山弱水胡渭曰疑即岨字之誤寰宇記曰合黎水一名羌谷鮮水一名覆袁水亦名張掖河南自吐谷渾界流入禹貢導弱水至於合黎孔安國云合黎水名在流沙東即謂此也詳河水篇第二卷注中

補黑水

禹貢錐指曰傳云黑水自北而南經三危過梁州入南



海正義云地理志益州郡計在蜀郡西南三千餘里故滇王國也武帝元封二年始開為郡郡內有滇池縣縣有黑水池止言有池不知水之所在鄭云今中國無也傳之此言順經文耳案酈道元水經黑水出張掖雞山南流至燉煌過三危山南流入於南海然張掖燉煌竝在河北所以黑水得越河入南海者自積石以西皆多伏流故黑水得越而南也今案滇池所祠之黑水即金沙江與雍州無涉山海經曰灌湘之山又東五百里曰雞山黑水出焉而南流注於海雞山不知在何郡郭璞無注而孔疏引水經以為出張掖之雞山檢今本無此

文蓋其書有散逸耳太平御覽引張掖記曰黑水出縣界雞山亦名元圃昔有娥氏女簡狄浴於元邱之水即黑水也據此則雞山當在甘州張掖縣界漢為臚得縣地今陝西甘州衛西有張掖河即古羌谷水出羌中北流至衛西為張掖河合弱水東北入居延海俗謂之黑河此水竝不經三危入南海安得以此為禹貢之黑水耶山海經明言南流注於海必非東北入居延之張掖河其雞山恐亦不在縣界也又曰夏殷之衰雍州西北境皆為戎翟所據及周室東遷舊都八百里之地悉棄以予秦秦染夷俗諸侯擯之不與中國會盟輜軒之使



水經注卷之四十一 補黑水  
莫有過而問焉况三危西裔之區乎故屈原天問曰黑  
水元趾三危安在蓋自戰國時此地之山川已與崑崙  
弱水同其渺茫僅得之傳聞而無從目驗矣秦火之後  
載籍淪亡漢興治尙書者不能言黑水三危之所在武  
帝通西域玉門陽關之外使者往來數十輩不聞涉大  
川而西可以當古之黑水者故班志張掖酒泉燉煌郡  
下竝無其文司馬彪亦無可言至酈道元始云黑水出  
張掖雞山而所謂南流至燉煌過三危入南海亦不  
過順經爲義與他水厯敘所過之郡縣者詳略相去遠  
矣故杜佑云道元注水經銳意尋討亦不能知黑水所

經之處唐初魏王泰括地志云黑水出伊吾縣北此與  
張掖雞山未知孰是然其所謂南流絕三危者竟亦不  
可復尋禹治黑水不若治河之詳自屈原已不能知而  
况伏生輩乎自古文尙書家已不能知而况班固司馬  
彪酈道元魏王泰諸人乎至若樊綽程大昌金履祥李  
元陽等紛紛辨論繫風捕影了無所得徒獻笑於後人  
而已

嵩高爲中嶽在潁川陽城縣西北

春秋說題辭曰陰含陽故石凝爲山國語曰禹封九山  
山土之聚也爾雅曰山大而高曰崧合而言之爲崧高



分而名之爲二室西南爲少室東北爲太室嵩高山記  
曰山下巖中有一石室云有自然經書自然飲食又云  
山有玉女臺言漢武帝嘗見之因以名臺

泰山爲東嶽在泰山博縣西北

岱宗也王者封禪於其山示增高也有金策玉檢之事  
焉

霍山爲南嶽在廬江濳縣西南

天柱山也爾雅云大山宮小山曰霍開山圖曰其山上

侵神氣下固窮泉全氏曰按禹貢不志霍山蓋以五岳  
而類及之一清按下又出衡山則禹  
貢荆州之山爲南嶽也此  
因漢武帝改祀而特記之

華山爲西嶽在宏農華陰縣西南

古文之惇物山也一清按漢志右扶風武功縣下云垂  
山古文以爲惇物非華山也道元誤

引朱謀璋曰豈  
垂華字相亂耶

雷首山在河東蒲坂縣東南砥柱在河東大陽縣東河中

王屋山在河東垣縣東北也

昔黃帝受丹訣于是山也

太行山在河內野王縣西北

王烈得石髓處也

恒山爲北嶽在中山上曲陽縣西北碣石山在遼西臨渝

縣南水中也禹貢雖指曰漢志右北平驪成縣下云大碣  
山在縣西南莽曰揭石遼西郡絜縣下云有



大禹鑿其石夾右而納河秦始皇漢武帝皆嘗登之海  
水西侵歲月逾甚而苞其山故言水中矣  
析城山在河東濩澤縣西南太嶽山在河東永安縣壺口  
山在河東北屈縣東南龍門山在河東皮氏縣西梁山在  
馮翊夏陽縣西北河上荆山在馮翊懷德縣南岐山在扶  
風美陽縣西北開山在扶風汧縣之西也  
禹貢北條山也一清按道元既參用馬融王肅之說以  
西頃為中條嶓冢為南條則宜以汧山

為北條地理志右扶風汧縣下云吳山在西古文以為  
汧山雍州山又總敘云雍州山曰嶽師古曰即吳嶽也  
此本周禮鄭康成說而渭水篇注則又引隴山全氏曰  
班志左馮翊懷德禹貢北條荆山之文隴山此篇專  
釋禹貢而隴山非禹貢所及漢志隴坂即今之隴山汧隴  
隴坂在其西也師古曰隴坂謂隴坂即今之隴山汧隴  
相接道元或因汧及隴本注中贗字其後  
脫落謬置誤作經文未可知也今改正

終南山惇物山在扶風武功縣西南也西頃山在隴西臨  
洮縣西南一清按漢志隴西郡臨洮縣禹貢西頃山在  
縣西南部都尉治縣西句此云西南蓋誤截

禹貢中條山也

嶓冢山在隴西氏道縣之南

南條山也

鳥鼠同穴山在隴西首陽縣西南



鄭元曰鳥鼠之山有鳥焉與鼠飛行而處之又有止而  
同穴之山焉是二山也鳥名為鷓而黃黑色鼠如  
家鼠而短尾穿地而共處鼠內而鳥外孔安國曰共為  
雌雄杜彥達曰同穴止宿養子互相哺食長大乃止張  
晏言不相為牝牡故因以名山

積石在隴西河關縣西南

山海經云山在鄧林東河所入也

都野澤在武威縣東北

縣在姑臧城北三百里東北即休屠澤也古文以為豬  
野也其水上承姑臧武始澤澤水二源東北流為一水

逕姑臧縣故城西東北流水側有靈淵池王隱晉書曰

漢末博士敦煌侯瑾善內學語弟子曰涼州城西泉水

當竭有雙闕起其上至魏嘉平中武威太守條茂起學

舍築闕於此泉太守填水造起門樓與學闕相望泉源

陡發重導於斯故有靈淵之名也澤水又東北流逕馬

城東城即休屠縣之故城也本匈奴休屠王都謂之馬

城河又東北與橫水合水出姑臧城下武威郡涼州治

地理風俗記曰漢武帝元朔三年改雍州曰涼州以其

金行土地寒涼故也遷於冀

全氏曰按續志涼州刺史治漢陽之隴縣其再遷冀

則中葉以後事晉徙治此王隱晉書曰涼州有龍形故曰臥龍



城南北七里東西三里本匈奴所築也及張氏之世居也又增築四城箱各千步東城殖園果命曰講武場北城殖園果命曰元武圃皆有宮殿中城內作四時宮隨節遊幸并舊城為五街衢相通二十二門大繕宮殿觀閣采綺妝飾擬中夏也其水側城北流注馬城河河水又東北清澗水入焉俗亦謂之為五澗水也水出姑臧城東而西北流注馬城河河水又與長泉水合水出姑臧東指次縣王莽之播德也西北歷黃沙阜而東北流注馬城河又東北逕宣威縣故城南又東北逕平澤晏然二亭東又東北逕武威縣故城東漢武帝太初四年

匈奴渾邪王殺休屠王以其眾置武威縣武威郡治齊氏召南曰本紀元狩二年置武威酒泉郡志云武威郡太初四年開則不同時矣疑當以紀為是一清按功臣表昆邪以元狩二年封則王莽更名張掖地理志曰谷水志誤也善長又誤仍之王莽更名張掖地理志曰谷水出姑臧南山北至武威入海屈此水流兩分一水北入休屠澤俗謂之為西海一水又東逕一百五十里入豬野世謂之為東海通謂之都野矣全氏曰漢志武威郡姑臧縣南山谷水所出北至武威入海行七百九十里道元以為通謂之都野是也攷蒼梧縣南山裕陝水所出北至摺次入海休屠縣都尉治熊水鄣谷水裕陝水熊水皆澤之所屬也裕師古曰古松字也陝音下陝反兩山之閒也裕陝陝名

合離山在酒泉會水縣東北



合黎山也

一清按元和志合黎山俗名要塗山在張掖縣西北二百里括地志云蘭門山一名合黎誤行都司志合黎山在甘肅州合離北四十里迤邐至鎮東所出石峽口三百里一作合離禹貢雖指漢會水縣故城在今肅州衛東北十六國春秋呂光遣呂纂討段業戰於合離羌谷水北至張掖縣合黎山下與弱水合故因山為名曰合黎水

流沙地在張掖居延縣東北

居延澤在其縣故城東北尙書所謂流沙者也形如月生五日也弱水入流沙流沙沙與水流行也亦言出鍾

山西行極崦嵫之山在西海郡北

全氏曰此漢獻帝時曹氏所置之西海郡非新莽置於金城者也

山有石赤白色以兩石相打則水潤打之不已潤盡則火出山石皆然炎起數丈經日不滅有大

黑風自流沙出奄之乃滅其石如初言動火之事發疾

經年故不敢輕近耳流沙又逕浮渚歷壑市之國又逕

於烏山之東朝雲國西歷崑山西南出於過瀛之山

按以上所引本之大荒經而有脫失据本文歷壑市又有國曰沱葉曰烏山曰淮山曰朝雲之國注中過瀛之道元有撮以成文

大荒西經云西南海之外流沙出焉逕夏后開開上三嬪於天得九辯與九歌焉

一清按上三嬪于天謂獻美女子于天帝朱子以為當是啓夢賓天吳任臣曰夏啓三夢上賓于天得傳天帝之樂如秦穆聽鈞天之奏唐王效霓裳之舞也楚辭啓棘賓商九辯九歌正作賓字開即啓避漢景帝諱然大荒西經之文曰西南海之外赤水之南流沙之西有九歌焉則乘兩龍名夏后開開上三嬪于天得九辯與九歌焉則非夏啓也道元

又歷員邱不死山之西入於南海

一清按蓋抄變其詞

卷四十一

統

統

統

統

統

統



句員邱二字出郭璞注非山海經文全氏曰漢志張掖酒泉敦煌多有水道道元不之詳而泛濫于山海經甚矣其蔽也

三危山在敦煌縣南

山海經曰三危之山三青鳥居之是山也廣圓百里在

鳥鼠山西即尚書所謂竄三苗於三危也禹貢錐指曰正義云三危

山必是西裔未知山之所在鄭元引地說曰三危之山在鳥鼠之西南當岷山則在積石之西南地說乃妄書

言未必可信要之三危山必在河之南也按水經兩引

岷山則在今臨洮府南岷州衛北矣又云在積石之西

南殊不可曉山南帶黑水蓋以扶州之黑水出素領山

入白水者當之也妄言無疑三危山自當以在沙州者

為是肅州舊志云白龍堆沙東倚三危北望蒲昌是為

西極要路推其地望可以得三危之形勢矣地理今釋

云梁州黑水即今雲南之金沙江其源發于西蕃諾莫

渾五巴什山分支之東曰阿克達母必拉南至塔城關

入雲南麗江府境亦曰麗水東南流至姚安府大姚縣

之左邛邛南山又東至東川府西折而東北流逕烏蒙府

逕會川衛南又東至東川府西折而東北流逕烏蒙府

陝西甘肅塞外南流至河州入積石河今俗名大通河

是也導川黑水即今雲南之瀾滄江其源發于西蕃諾

莫渾五巴什山分支之西曰阿克達母必拉南流至你那山

入雲南界東破一分支為漾備江東南流分注大理府之

西洱海經流順甯府境其正支南流絕雲龍江而東

入南海案金沙瀾滄一為梁州之黑水一為導川之黑

水然皆非四大水之多黑故悉蒙黑名如打冲金沙瀾滄

色得稱黑水也而真黑水之源去瀾滄之西三百餘里

蕃名哈拉烏蘇色禽經蒙蕃怒獾獾界由緬甸入南

海即佛書所謂黑水出阿耨達之東故名震旦所入大

至蓋中國在阿耨達之東故名震旦所入大唯黃河

一支可見黑水出阿耨達之東故名震旦所入大唯黃河



諸家紛如今考地圖禹貢之黑水有三正不必強合水  
 經注所謂黑水出張掖南廣縣注云紛關山符黑水所  
 也漢書地理志隄入江唐樊綽亦以麗江為古黑水云羅些  
 城北有三危山其水從山南行上流出吐蕃界薛季宣  
 謂瀘水為黑水引酈道元說黑水亦曰瀘水即若水出  
 姚州微外吐蕃界中山海經黑水之閒有若水是以  
 麗江之說為非不知打冲河至大姚縣即合金沙江會  
 流入岷江薛氏之說原與漢志相合此梁州之黑水也  
 宋程大昌以瀘滄江為黑水李元陽黑水辨亦云隴蜀  
 無入南海之水唯瀘江為黑水滄足以當之而元史載勸農  
 官張立道使交趾黑水瀘滄江以至此導川之黑水也蓋雍州之黑水  
 亦以瀘滄為古黑水此導川之黑水也蓋雍州之黑水也  
 其源在黃河之北梁州及導川之黑水也蓋雍州之黑水也  
 尋源而求然不相紊者第以張掖燉煌尚內地在黃河  
 崑崙為地軸其山根連延起頓包越河南接秦隴直達長  
 安為南山黑水自燉煌而南縱可越大河之伏流其不  
 能越河以南之南山也明矣若狃于雍州三危既宅之  
 說此是言雍州分域以內今終南鳥鼠皆在河之南而

三危更無鳥鼠之南其與雍州之黑水又何涉邪然主  
 瀘水麗江瀘滄之說者亦皆以意度未能確指水之分  
 合不知瀘水麗江源異而流同麗江瀘滄源近而流別  
 一地也而古未有及之者蓋以二水僻在蕃界隔蔽南  
 山阻與從古未通中國即魏之法顯唐之元奘元世祖  
 之南征邱處機之西遊皆繞出崑崙以外歷西域諸國  
 至于滇南總未嘗經其地但從入中國之外支流以古今  
 分域配之料約為某地但從入中國之外支流以古今  
 外咸入版圖爰遣使臣徧歷其地究源討委寫圖以誌  
 支派經絡所折衷矣 春秋傳曰允姓之姦居于瓜州  
 瓜州地名也杜林曰敦煌古瓜州也州之貢物地出好  
 瓜民因氏之瓜州之戎并于月氏者也漢武帝後元年  
 分酒泉置 齊氏召南日本紀分武威酒泉為張掖敦煌  
 也南七里有鳴沙山故亦曰沙州也



朱圉山在天水北冀城南

即冀縣山有石鼓開山圖謂之天鼓山九州害起則鳴有常應又云石鼓山有石鼓於星為河鼓星動則石鼓鳴石鼓鳴則秦土有殃鳴淺殃萬物鳴深則殃君王矣

岷山在蜀郡湔氐道西

漢書以為瀆山者也

蟠冢山全氏曰三字誤說見下在宏農盧氏縣南

是山也穀水出其北林也全氏曰按蟠冢山當作蟠冢林見山海經且穀水出宏農龜池與盧氏無涉桑經鄴注于穀水篇悉本山經之舊至此甯遂忘之此篇專釋禹貢山水澤地所在蟠冢林非禹貢之所有篇中獨失去熊耳山則蟠冢二字即熊耳二字簡策零斷行間失次假人率意填寫又假作注

文以附會之未可知也漢志宏農郡盧氏縣下云熊耳山在東東近于南不至相懸說地理者當以班志為據

荆山在南郡臨沮縣東北

東條山也朱氏謀璋箋曰東條未詳一清按禹貢錐指臨沮縣之東北是六朝漢書誤本道元襲用之耳然既以臨沮之荆山為東條矣顧于蟠冢下云南條山也數不原舊說有三條之目地理志云禹貢北條荆山在襄淺南條荆山在臨沮而臨沮之西頃不云是中條既不襲德南條荆山在臨沮而臨沮之西頃不云是中條既不襲襲用馬融王肅之說酈氏前遵馬王又雜采班氏然以荆山為東條則大謬矣三條鄭元又分為四列導沂為正陰列西頃為次陰列蟠冢為次陽列岷山為正陽列胡渭曰四列長于三條或嫌其陰陽之名近怪曰陰陽只作南北字用朱子據導字分南北實本康成而又參以一行山河兩戒之卡和得玉璞於是山楚王不理懷說然則究無東條也

璧哭于其下後王使玉人理之所謂和氏之玉焉



丙方山在江夏竟陵縣東北

禹貢注章山也

顧氏祖禹曰章山在安陸府東四十里古文以為丙方山左傳定公四年蔡侯

吳子唐侯伐楚舍舟于淮汭自豫章與楚夾漢圖經云豫章即章山也一名障山晉太安二年華宏討義陽賊

張昌于江夏敗于障山即此

大別山在廬江安豐縣西南

一清按大別是魯山即外方山古翼際山不在安豐也

山崧高是也

一清按漢志云古文以密高為外方山此條與首條參互

平氏縣東南陪尾山在江夏安陸縣東北

禹導陪尾實為泗水泗出陪尾見博物志然則不在江夏安陸也

衡山在長沙湘南縣南

禹治洪水用白馬祭衡山于是得金簡玉字之書按省

玉字得通水理也

九江地在長沙下雋縣西北

全氏曰據漢志九江在廬江為洞庭本于水經胡晁曾因之指此條也予觀經之所據

當是楚地記所云巴陵瀟湘之淵在九江之間者善長注

一見于江甯有遺忘其疏九江主劉歆湖漢九水之說

之將無謂善長于經有異耶則宜糾正之矣今不論列

一言何也夫九江與東陵相首尾以九江為湖漢則東陵

當在廬江以九江為洞庭則東陵當在巴陵無兩可也今

水經云九江在長沙下雋而東陵在廬江金蘭自相

矛盾有是理乎殆不學之人見行間脫爛從而妄補之而

不能掩其敗闕也至于九江之不見行間脫爛從而妄補之而

疑之而胡梅圃尤疑之北宋以來大儒數十輩考正審定

而終不得其是抑九江固不可以言地若九地果是甚

文則如大徑地善長亦必指其失也一清按全氏之說甚

辨但此條決非後人添補道元專附班固故不以洞庭為

九江而又不顯斥水雲夢澤在南郡華容縣之東東陵

地在廬江金蘭縣西北

一清按漢志廬江郡下云金蘭西

北有東陵鄉顧祖禹曰

金蘭縣亦

水經注釋

卷四十一



水經注釋 禹貢山水澤地所在 蘇林也又曰或以為三

見漢志蘇林注檢今本漢書注非蘇林也又曰或以為三  
國魏所置縣晉廢蓋在大蘇山東胡渭曰金蘭漢初有是  
縣中廢故志不書晉宋間復置故鄴注據以爲言當在固  
始西南南直黃梅之北矣今考善長注所說金蘭縣見決  
水篇而晉宋志均無之也數淺原地在豫章歷陵縣南一  
宛溪東樵所言均未的也彭蠡澤在豫章歷陵縣南一  
按漢志豫章郡歷陵傅山傳易川在彭蠡澤在豫章彭  
南古文以為傳淺原而水經不載此川

澤縣西北

尚書所謂彭蠡既豬陽鳥攸居也

中江在丹陽蕪湖縣西南東至會稽陽羨縣入於海震澤

在吳縣南五十里北江在毘陵北界東入於海

本漢志以成書非禹貢之三也且亦未嘗入震澤也夫江流祇  
具區澤在西古文以為震澤南江在東南入海揚州川以  
震澤為南江且合石城分江水為一條蓋承其繆孔安國導江  
為南江且合石城分江水為一條蓋承其繆孔安國導江

傳云有北中可知導漾傳云自彭蠡江分為三入震澤  
澤夫彭蠡未嘗分為三也且亦未嘗入震澤也夫江流祇  
一川耳禹貢漾水之北江即江水也夫江流祇一川耳禹貢  
朝宗于海者也故師古于北江曰自彭蠡出班志之所謂中  
北江而海者又于中江下云亦自彭蠡入彭蠡而東至海為  
禹迹也禹貢錐指曰蘇氏曰豫章江入彭蠡而東至海為  
南江岷江之經流會彭蠡以入海為中江徐堅初學記引  
會彭蠡為北江蘇氏之說人或疑之及閩徐堅初學記引  
鄭康成書注以證三江之說左合漢為北江右會彭蠡為南  
江岷江居其中則為中江故書稱東為中江者明岷江至  
彭蠡與南北合始得稱中江也始知蘇氏所說東漢時固已  
有之矣越語子胥曰吳塘浦陽也三江環之民無所移  
韋昭注云三江者非吳塘浦陽也三江環之民無所移  
江五湖之利者非吳塘浦陽也三江環之民無所移  
國語也水經沔水非吳塘浦陽也三江環之民無所移  
浙江也水經沔水非吳塘浦陽也三江環之民無所移  
陵縣季札所謂以此當國語之引郭景純曰三江者何也漢志  
之鄴元云浙江居北江在東北是環吳之塘境而韋獨遺  
而韋強分為二故以岷易浦陽較長也然終不可以釋禹



水經注釋禹貢山水澤地所在  
貢蓋松江乃震澤之下流以松江為中江浙江為南江與  
導水之文相背戾矣又曰職方氏荆州曰其川江漢揚州  
日其川三江與禹貢同蓋荆州未會彭蠡故但稱江漢及  
至揚州則江漢與彭蠡參會故有三江之目二經若合符  
節

嶧陽山在下邳縣之西羽山在東海祝其縣南也

縣即王莽之猶亭也一清按此文與淮水篇複出尚書殛鯀於羽山

謂是山也山西有羽淵禹父之所化其神為黃能以入淵矣故山海經曰洪水滔天鯀竊帝之息壤以堙水不待帝命帝令祝融殺鯀羽郊者也

陶邱在濟陰定陶縣之西南

陶邱邱再成也

荷澤在定陶縣東雷澤在濟陰成陽縣西北荷水在山陽

湖陸縣南全氏曰荷澤在定陶班志語也荷水在湖陸孔傳及許氏說文語也二荷有上下之分故水經

兼引之而胡渭曉曉于此抑昧矣蒙山在太山蒙陰縣西南大野澤在山

陽鉅野縣東北大邳地在河南成皋縣北

爾雅曰山一成謂之邳然則大邳山名非地之名也

明都澤在梁郡睢陽縣東北一清按漢志梁國睢陽縣禹貢盟諸澤在東北益州

沱水在蜀郡汶江縣西南其一在郫縣西南皆還入江荆

州沱水在南郡枝江縣全氏曰汶江縣之沱為開明所鑿郫縣之沱是湔壩江李冰所堰皆

非禹迹也顧祖禹嘗疑之而不能指沱之所在豈益州無沱水乎予謂江水篇都安縣下注云郫江水出焉武陽縣下注云郫江水入焉郫江出江入江與沱義合禹貢錐指亦曰江原縣郫江水近世謂之大阜江者岷江之正流而



水經注卷之四  
禹貢山水澤地所在  
班氏以為首受江荆州之沱惟枝江足以當之一清按全氏  
之沱或庶幾焉荆州之沱當主夷水故皆有沱潛既道  
此言亦未的梁荆二州之沱又東至于澧直以江沱與澧水  
之文而導江云東別為沱又東至于澧直以江沱與澧水  
相連接而導漾下不別出沱  
也是其明證也詳見夷水篇  
三澨池在南郡郎縣之北  
錐指曰水經三澨池今本作地字為是然自酈道元時已  
譌觀注云池流可見傳寅集解引此亦作池明地字乃近  
世所改一清按水經自明正嘉以來屢經各家校刊改  
池為地池雖誤文實古本也故不从俗改作地字耳

尚書曰導漢水過三澨地說曰沔水東行過三澨合流  
觸大別山阪故馬融鄭元王肅孔安國等咸以為三澨  
水名也許慎言澨者埤增水邊土人所止也按春秋左  
傳曰文公十有六年楚軍次於句澨以伐諸庸宣公四  
年楚令尹子越師於漳澨定公四年左司馬戍敗吳師

於雍澨昭公二十三年司馬蕩越縊於蓬澨服虔或謂  
之邑又謂之地京相璠曰杜預亦云水際及邊地名也

一清按春秋成十五年傳則今南陽清陽二縣之間清  
決睢澨杜預注曰澨水涯

水之濱有南澨北澨矣而諸儒之論水陸相半又無山  
源出處之所津途關路唯鄭元及劉澄之言在竟陵縣  
界經云郎縣北池然池流多矣而論者疑焉亦不能辨

其所在一清按此篇惟釋禹貢山水澤地所在不及其  
也索隱引水經亦云三澨地名今竟陵有三澨水俗云  
是三十里漢讀曰又即禹貢三澨故地也最為低窪然道  
元又明明注為池字則非傳寫之誤可知而不能正其  
謬殆強弩之末博學  
好奇或未致思耳



水經注釋

禹貢山水澤地所在

三

目去

右禹貢山水澤地所在凡六十

全氏曰按六十之目去隴山之誤文改正

之訛字釐定三溢池之標目斯為脗合前人讀水經注者至此大氏以將畢業神疲力索不復細討于是隴山竄入熊耳喪職而三溢池且為寄公矣可發一笑也

水經注釋卷四十終

海甯錢保塘  
華陽吳祖椿  
覆校



